

AMOR DI DIOS PA HENDE

Tantu naturalesa i rebelashon ta duna testimonio di e amor di Dios. Nos Tata na shelu ta e fuente di bida, di sabiduria, i di alegria. Mira e kosnan maravioso i bunita di naturalesa. Pensa di nan adaptashon maravioso na e neseditatnan i felisidat, no solamente di hende, sino di tur kriatura ku tin bida. Solo i áwaseru, ku ta alegrá i refreská tera, serunan, vayanen i laman, tur ta mostra nos e amor di e Kreador. Dios ta esun ku ta supli e neseditatnan diario di tur Su kriaturanan. E salmista a bisa:

«Tur ta fiha nan bista riba Bo,

*I Bo ta duna nan kuminda na tempu. Bo ta habri
bo man i ta kumpli*

Ku deseo di tur loke tin bida».

(Salmonan 145:15, 16)

Dios a krea hende perfektamente santu i felis; i e tera bunita, manera el a sali for di man di e Kreador, no tabatin mancha di dekadensia, ni sombra di maldishon. E fayamentu ku e lei di Dios e lei di Amor ta loke a trese sufrimentu i morto. Sinembargo, ainda meimei di e sufrimentu ku ta resultado di piká, Dios Su amor ta wórdu revelá. Ta pará skirbi ku Dios a maldishoná mundu pa motibu di hende (Genesis 3:17). Sumpiñanan, difikultatnan i pruebanan ku ta hasi di su bida un bida di trabou i kuido a wórdu apuntá pa su bon,

KAMINDA NA KRISTU

komo parti di e entrenamentu nesenario den e plan di Dios pa yud'é lanta for di ruina i degradashon ku piká a trese ku n'é. Mundu, aunke el a kai, no ta solamente tristesa i miseria. Den naturalesa mes tin mensahenan di speransa i konsuelo. Tin flor den mata di sumpiña, i sumpiña ta tapá ku rosanan.

«DIOS TA AMOR», ta skirbi riba kada kónopi di flor ku ta habri, riba kada drachi di yerba ku ta nase. E paranan bunita ku ta yena airu ku melodia di nan kanto alegre, e flornan matisá bunita ku ta perfumá aire den nan perfekshon, e palunan haltu den mondi ku nan ramanan bérdé bibu tur ta mustra e kuido tierno i paternal di nos Dios i su deseo pa hasi su yunan felis.

E Palabra di Dios ta revelá su karakter. E mes a deklará Su amor infinito i kompashon. Ora ku Moises a bisa: «Mi ta roga bo pa bo mustra mi bo gloria», Señor a respondé: «Mi ta hasi tur mi bondat pasa dilanti di bo bista». (Eksodo 33:18, 19) Esaki ta Su gloria. Señor a pasa dilanti Moises bisando: «Ami ta SEÑOR, un Dios generoso, klemente, ku pasenshi, bondadoso i fiel. Mi ta bondadoso te den di mil generashon i Mi ta pordoná maldat, rebeldia i piká.» (Eksodo 34:6,7) «E ta tarda pa rabia i ta grandi den misericórdia.» (Jonas 4:2) «Pasobra E ta gusta misericórdia» (Mikéas 7:18).

Dios a uni nos kurason ku n'E pa medio di señalnan innumerabel den shelu i riba tera. Pa medio di kosnan di naturalesa, i lasonan mas tierno i profundo, ku kurason humano por konosé, El a

AMOR DI DIOS PA HENDE

perkurá revelá Su mes na nos. Sin embargo, tur esakinan ta mustra nos solamente un parti di Su amor. Aunke tur e evidensia aki a wórdu duná, e enemigu di bondat a siega e kompromedementu di hende, pa nan mira Dios ku miedu; pa hende pensa ku Dios ta mashá severo i no ta pordoná. Satanas a hiba hende na konsiderá Dios komo un ser ken su atributo prinsipal ta hustisia severo — un wes estrikto, duru, i eksigente. El a pinta e Kreador manera un ser ku ta vigilando ku wowo yalurs pa haña faltanan di hende, pa E por huzga nan. Pa e motibu ei Hesus a bin biba meimei di hende, pa kita e sombra skur aki, pa revelá na e mundu e amor infinito di Dios. E yu di Dios a baha for di shelu pa manifestá e Tata. «Nunka niun hende no a mira Dios, ma su Yu uniko, pegá na Tata su kurason i Dios meskos ku Tata, a revelá ken Dios ta» (Juan 1:18). «Ni, niun hende no konosé e Tata, sino e Yu so i esnan ku e Yu ke laga konosé e Tata» (Mateo 11:27). Ora ku un di e disipelnan a hasi e petishon, «Mustra nos e Tata,» Hesus a kontestá, «Mi tin asina tantu tempu huntu ku boso i bo no konosé Mi ainda, Felipe? Esun ku a mira Mi, a mira Tata» (Juan 14:8, 9). Deskribiendo Su mishon riba tera, Hesus a bisa, Señor «a skohe Mi pa anunsiá e bon notisia na pobernan. El a manda Mi proklamá libertat pa prezunan; restorá bista di siegunan; i duna esnan oprimi, libertat» (Lukas 4:18). Esaki tabata Su trabou. El a bai rónt hasiendo bon, i kurando tur

KAMINDA NA KRISTU

esnan ku tabata oprimi pa Satanas. Tabatin aldeanan kompleto kaminda no tabata tende ni un keho di enfermedat den niun kas; pasobra El a pasa ei, i a kura tur esnan ku tabata malu. Su trabou tabata mustra Su unguentu divino. Den kada akto di Su bida El a mustra amor, misericórdia i kompashon; Su kurason tabata yená di simpatia pa yunan di hende. El a tuma naturalesa di hende pa e por a simpatisá ku nan nesesidat. Esnan di mas pover i humilde no tabatin miedu di yega serka djE. Te asta muchanan tabata gusta di ta serka djE. Nan tabata gusta sinta riba Su skochi i keda wak e kara pensativo, yen di amor.

Hesus no a skonde ningun palabra di bérdat, ma semper E tabata papia esaki ku amor. E tabata usa masha taktó i konsiderashon den Su trato ku e hendenan. Nunka E tabata brutu. nunka El a papia un palabra severo sin tabatin nodi. nunka El a duna doló innesesario na un alma sensibel. Nunka El a kritiká debilidat humano. E tabata papia e bérdat, ma semper den amor. El a denunciá hipokresia, inkredulidat, i maldat: ma tabatin tristesa den Su stem segun E tabata reprendé nan fuertemente. El a yora pa Yerusalém e stat ku E tabata stima, ku a nenga di risibi'É ku ta e Kaminda, e Berdat i Bida. Nan a rechas'É, e Salvador, ma E tabata konsidera nan ku ternura piadoso. Su bida tabata un bida di nenga su mes i kuido atento pa otronan. Kada alma tabata presioso den Su bista. Miéntras ku semper E tabata komportá Su mes ku dignidat divino, E tabata

AMOR DI DIOS PA HENDE

mustra e mas tierno konsiderashon na kada miembro di e famia di Dios. Den tur hende E tabata mira almanan ku tabata Su mishon pa salba.

Tal tabata e karakter di Kristu manera E tabata mustra' den Su bida. Esaki ta e karakter di Dios. Ta for di e kurason di e Tata e riunan di kompashon divino, manifestá den Kristu, ta sali bin na e yunan di hende. Hesus, e Salvador tierno, kompasivo, tabata Dios «manifestá den karni». (1 Timoteo 3:16).

Hesus a biba i sufri i muri pa redimi nos. El a bira un «Hómber di sufrimentu», pa nos por partisipá di goso eterno. Dios a pérmitti Su Yu stimá, yen di grasía i bérdat, bini for di un mundu di gloria indeskríbibel, na un mundu manchá i korumpi dor di piká, skur ku e sombra di morto i maldishon. El a pérmitti'É laga e pechu di Su amor, i adorashon di e angelnan, pa bin sufri bergwensa, insulto, umiashon, odio, i morto. «E kastigu ku El a pasa a trese pas pa nos; danki na Su yaganan nos a haña. kura». (Isaias 53:5). Mir'E den desierto, den Getsemani, mir'E riba e krus! E Yu sin mancha di Dios a tuma riba E mes e karga di piká. E ku tabata un ku Dios a sinti den Su alma e separashon teribel ku piká ta trese entre Dios i hende. Esaki a saka for di Su boka e gritu di angustia, «Mi Dios, Mi Dios, pakiko Bo a bandoná Mi?» (Mateo 27:46). Tabata e karga di piká, e sentido di su nifikashon teribel, di e separashon ku e ta kousa entre e alma i Dios — esaki ta loke a

KAMINDA NA KRISTU

kibra e kurason di e Yu di Dios.

Ma e gran sakrifisio aki no a wórdu hasi pa krea amor pa hende den kurason di e Tata, tampoko pa hasi'E dispuesto pa pordoná. Nó, nó! «Dios a stima mundu asina tantu ku El a duna Su uniko Yu». (Juan 3:16). E Tata ta stima nos, no pa motibu di e gran rekonsiliashon, ma El a proveé e rekonsiliashon pasobra E ta stima nos. Dor di Kristu E por a manda Su amor infinito na un mundu ku a kai den piká. «Dios a rekonsiliá mundu ku nÉ mes pa medio di Kristu» (2 Korintionan 5:19). Dios a sufri huntu ku Su Yu. Den e agonia di Getsémani, e morto di Kalvario. e kurason di Amor Infinito a paga e preis di nos redenshon.

Hesus a bisa, «P'esei Mi Tata ta stima Mi, pasobra Mi ta dispuesto na entregá Mi bida pa despues Mi tum'é bék» (Juan 10:17). Es desir, «Mi Tata a stima boso asina tantu ku asta E ta stima Mi mas pasobra Mi a duna Mi bida pa redemi boso. Birando boso Supstituto i Seguridat, dor di entregá Mi bida, dor di tuma boso responsabilidatnan, i boso transgreshonnan over, Mi ta stimá dor di Mi Tata, pasobra dor di Mi sakrifisio, Dios por ta hustu, i sin embargo, ser e Hustifikadó di esun ku ta kere den Hesus».

Ningun otro sino e Yu di Dios por a logra nos redenshon; pasobra solamente E ku tabata den skochi di e Tata por a deklar'E. Solamente E ku tabata konosé e haltura i profundidat di e amor di Dios por a manifestá esaki. Nada ménos ku e sakrifisio infinito ku Kristu a hasi na fabor di hende

AMOR DI DIOS PA HENDE

ku a kai den piká por a ekspresá e amor di e Tata pa humanidat kai.

«Dios a stima mundu asina tantu, ku El a duna Su uniko Yu stimá» . El a dun'É no solamente pa biba meimei di hende, pa karga nan pikánan, i muri nan sakrifisio, El a dun'É na e rasa kai. Kristu mester a identifiká Su mes ku e interesnan i nesesidatnan di humanidat. Esun ku tabata un ku Dios a konektá Su mes ku e yunan di hende via lasonan ku nunca lo por kibra. Hesus «no tin bérgwensa pa yama nan Su ruman» (Hebreonan 2:11). E ta nos Sakrifisio, nos Abogado, nos Ruman Hómbler, ku tin nos forma humano dilanti trono dje Tata, i pa edatnan etérno E lo ta un ku e rasa ku El a redemi — e Yu di hende. I tur esaki pa asina hende por lanta for di ruina i degradashon di piká pa nan por reflehá e amor di Dios, i komparti e goso di santidat.

E preis pagá pa nos redenshon, e sakrifisio infinito di nos Tata selestial den duna Su Yu pa muri pa nos, mester duna nos konseptonan eksaltá di loke nos por bira dor di Kristu. Segun e apóstel inspirá Juan a mira e haltura, e profundidat, e hanchura di e Tata Su amor pa e rasa pérdi, e tabata yená ku adorashon i reverensia; i fayando pa haña language korekto den kua e por ekspresá e grandesa i ternura di e amor aki, e ta yama na e mundu pa kontempl'é. «Mira kuantu Dios Tata ta stima nos: E ta permiti nos karga e nómbler 'yunan di Dios!'» (1 Juan 3:1). Kuantu balor esaki ta duna hende! Pa motibu di piká yunan di hende ta bira sirbidó di

KAMINDA NA KRISTU

Satanas. Dor di fe den e sakrifisio rekonsiliadó di Kristu, e yunan di Adam por bira e yunan di Dios. Dor di tuma naturalesa Humano. Kristu a elevá humanidat. Hende ku a kai den piká, danki na e konekshon ku Kristu. di bérdat nan por bira digno di e nomber «yunan di Dios».

Un amor asina no tin konparashon. Yunan di e Rei selestial! Promesa presioso! Tema pa e meditashon di mas profundo! E amor inkomparabel di Dios na un mundu ku no tabata stim'E! "E pensamentu aki tin un poder dominante i e ta hasi hende dispuesto na kumpli ku e boluntat di Dios. Mas tantu nos studia e karakter divino na lus di e krus, mas tantu miserikórdia nos ta mira, mas tantu ternura i pordon mesklá ku igualdat i hustisia, i mas kla nos ta bin kapta e kantidat di evidensianan di un amor ku no tin fin i kompashon tierno mas grandi ku amor di un mama pa su yu ku a bai den mal kaminda.

«Tur laso humano por kibra,
Separá un ruman for di otro,
Mama por lubidá su yu,
Streanan por varia di nan kaminda,
Pero sigur nunca lo kambai
E amor providente di Señor»

E PEKADOR MESTER DI KRISTU

Na prinsipio hende a risibe podernan nobel i un mente bon balansá. E tabata perfekto den su ser, i den harmonia ku Dios. Su pensamentunan tabata puru, su metanan santu. Ma pa motibu di desobedensia, su podernan a wordu pervertí, i egoismo a tuma lugá di amor. Su naturalesa a bira dje debilitá dor di transgreshon ku tabata imposibel p'é, den su mes forsa, resiste e poder di maldat. El a bira prisionero di Satanas, i lo a keda asina pa semper si Dios no a intervení den forma speshal. Tabata intenshon di e tentadó pa trose e plan ku Dios tabatin dia ku El a krea hende, i pa yena tera ku miseria i desolashon.

I despues e lo a yama hende su atenshon na e malu aki, pa laga pasa ku ta resultado di e obra di Dios den kreashon di hende.

Hende, den su estado di inosensia, tabata gosa di kompletu komunión ku n'E «den Ken tur e tesoronan di sabiduria i konosementu ta skonde» (Kolosenenan 2:3). Pero despues di su kaída e no por a haña alegria mas den santidat, i el a purba skonde for di e presensia di Dios. I te awe ainda esaki ta e kondishon di e kurason ku no a kambia. E no ta den harmonia ku Dios i no ta haña goso den komunión ku n'E. E pekador no por ta felis den presensia di Dios; e no ta gusta e kompania di hendenan santu. I si por a pèrmiti'é drenta shelu, e lo no a haña goso den e lugá ei. E spiritu di amor puru ku ta reina aya — kada kurason respondiendo

KAMINDA NA KRISTU

na e kurason di Amor Infinito — lo no move nada den su alma. Su pensamentunan, su interesnan, su motibunanan, lo ta diferente for di esnan ku ta biba den shelu. E lo ta un nota deskórdante den e melodia di shelu. Shelu lo ta p'é un lugá di pasa malu, un lugá di tortura; e lo anhelá pa skonde su mes for di presensia di Esun ku ta su lus, i e sénter di su goso. No ta un lei in hustu di parti di Dios ku ta eksklui malbadonan for di shelu; nan a sera porta pa nan mes i a mustra kla kla ku nan no ta pas pa e lugá ei. E gloria di Dios lo ta pa nan manera un kandela ku ta kaba ku tur kos. Nan lo deseá di ta destrui, pa nan skonde for di kara di Esun ku a muri pa salba nan.

E ta imposibel pa nos, di nos mes, skapa for di e pos di piká ku nos a kai aden. Nos kurason ta malu, i nos mes no por kambi'é. «Ken por saka algu puru for di loke ta impuru? Niun hende!» (Job 14:4). «Esnan ku un moda di pensa dominá pa nan naturalesa pekaminoso, ta enemigu di Dios, pasobra nan no ta someté nan na su lei ni nan no por tampoko» (Romanonan 8:7). Edukashon, kultura, ehersé e boluntat, esfuerso humano, tur tin su mes esfera, pero pa esaki nan tin ningun poder. Nan por hasi un korekshon parti pafó di e kondukta, pero nan no por kambia e kurason; nan no por purifiká e fuentenan di bida. Mester tin un poder ku ta traha paden, un bida nobo for di riba, promé ku hende por komberti su mes di piká na santidat. E poder ei ta Kristu. Solamente Su gracia por revivá e abilidadnan sin bida di e alma, i atraé

E PEKADOR MESTER DI KRISTU

na Dios, na santidad. E Salvador a bisa, «niun hende no por mira reino di Dios, si e no nase di nobo» (Juan 3:3). E idea ku ta nesario desaroyá solamente e bon ku ta eksisti den hende pa naturalesa, ta un engaño fatal. «Esun ku no tin Spiritu Santu no ta aseptá loke ta bini di Spiritu di Dios. Pa e nan ta kos di loko; e no por komprondé nan tampoko, pasobra hende por huzga balor di e kosnan ei solamente ku yudansa di Spiritu Santu» (i Korintionan 2:14). «No keda sorprendi pasobra Mi ta bisa bo ku boso mester nase di nobo» (Juan 3:7). Di Kristu ta pará skirbi, «Den djE tabatin bida i e bida aki tabata lus pa hende» (Juan 1:4), «Den djE so por haña salbashon; riba mundu no tin niun otro nómber duná na hende, ku por salba nos» (Echonan 4:12)

No ta basta pa nos komprondé e bondat di amor di Dios, ni mira bondat i ternura paternal di Su karakter. No ta basta pa nos konosé e sabiduria i hustisia di Su lei, mira ku e ta fundá riba prinsipio etérno di amor. Apóstel Pablo a mira tur esei ora el a bisa: «Mi ta di akuérdo ku lei ku e ta bon», «lei ta santu, i e mandamentu ta santu i hustu i bon». Ma el a bisa tambe den amargura di su alma agonizando i desesperá: «Mi ta di karni, bendi bou di piká». (Romanonan 7:16, 12, 14). E tabata deseá puresa, hustisia, ku den e mes e no tabatin poder pa alkansá, i el a sklama, «Esta un hende miserabel mi ta! Ken lo libra mi di e poder di morto ku ta obra den mi kurpa? (Romanonan 7:24). Esaki ta e lamento ku ta subi for di kurasonnan kargá tur

KAMINDA NA KRISTU

kaminda i den tur tempu. Pa tur di nan, tin solamente un kontesta, «Ata e Lamchi di Dios ku ta kita piká di mundu!» (Juan 1:29).

Tin hopi manera ku e Spiritu di Dios a buska pa ilustrá e berdat aki, i hasi'é kla pa e alma ku ta deseá di ta liber di e karga di piká. Tempu ku Yakob a peka, gañando Esau, i hui fo'i kas di su tata, e tabata kansá di e malu ku el a hasi. So i bandoná manera e tabata, separá di tur loke a hasi su bida presioso, e uniko pensamentu riba tur otro ku tabata oprimi su alma, tabata e miedu ku su piká a apart'é for di Dios, ku e tabata bandoná dor di Shelu. Den su tristesa, el a drumi riba tera pa e sosegá. Solamente serunan tabata rondon'é i shelu ku su streanan tabata tap'é. Ora ku el a pega soño, un lus straño a parse n'é den su soño; i ata, n'e lugá unda e tabata drumi, un trapi masha grandi a parse ku ta yega te den porta di shelu, i angelnan di Dios tabata subi i baha na e trapi; mientras ku den gloria di alturanan el a tende e bos divino ku un mensahe di konsuelo i speransa. Asina Dios a duna Yakob di konosé loke tabata satisfasé e nesesidat i ansha di su alma: un Salbadó. Ku alegria i gratitut el a mira un kaminda pa kua, e, un pekadó, por restourá su komunion ku Dios. E trapi den su soño tabata representá Hesus, e uniko medio di komunikashon entre Dios i hende.

Esaki ta mes un figura na kua Kristu a referi den Su kombersashon ku Natanael, ora el a bisa: «Lo boso mira shelu habri i e angelnan di Dios subiendo i bahando riba e Yu di hende» (Juan 1:51).

E PEKADOR MESTER DI KRISTU

Den su kaida hende a hala fo'i Dios; mundu a wórdu kortá fo'i shelu. Den e abismo ku tabatin meimei di nan no por tabatin komunikashon. Pero pa medio di Kristu mundu ta uni atrobe ku shelu. Pa Su mes méritonan Kristu a traha un brúg over di e abismo ku piká a hasi, di tal manera ku hende por tin komunikashon ku e angelnan ministradó. Kristu ta uni hende pekadó, debil i miserabel bék ku e Fuente di poder infinito.

«Ami ta e kaminda, bérdat i bida; niun hende no por yega serka Tata, si no ta pa medio di Mi.»

Juan 14:6

Ma e soñonan di progreso di hende ta pornada, su esfuersonan pa elevá humanidat ta pornada, si e menospresia e uniko fuente di speransa i ayudo pa e rasa kai.

«Tur regalu ku ta ekselente i tur don perfekto» ta bini for di Dios. (Santiago 1:17). Fuera di djE no tin berdadero ekselensia di karakter, i e uniko kaminda pa yega na Dios ta Kristu. E ta bisa, «Ami ta e kaminda, bérdat, i bida; ningun hende ta yega serka Tata, si no ta pa medio di Mi.» (Juan 14:6).

Kurason di Dios tin kompashon di Su yunan ku ta biba aki riba tera ku un amor mas fuerte ku morto. Dunando nos Su Yu, El a duna nos hinter shelu den un regalu. Bida i morto i interseshon di e Salbadó, e ministrashon di angelnan, e rogamentu di e Spiritu Santu, e Tata ku ta obra

KAMINDA NA KRISTU

riba tur i pa tur, e interes sin fin di e sernan selestial— tur ta wórdu mobilisá na fabor di redenshon di hende.

O, laga nos kontemplá e asombroso sakrifisio ku a wórdu hasi pa nos! Laga nos apresiá e trabou i e energia ku Shelu ta hasiendo pa salba esnan pérdi, i trese nan atrobe den kas di e Tata. Motibunan mas fuerte i medionan mas poderoso, nunca no a wórdu hasi. Akaso e gran rekompensanan pa e bon ku nos hasi, e goso di shelu, e sosiedat di angelnan. e komunion i amor di Dios i Su Yu, e oumento di nos inteligensia pa tempunan eterno, esakinan, esaki no ta basta motibu pa duna nos gana di dediká nos rnes i e amante sirbishi di nos kurason na nos Kreador i Salvador?

I, na e otro banda, e huisio di Dios kontra piká, e kastigu inevitabel, e degradashon di nos karakter, i e destrukshon final. Ta wordu presentá den Dios Su Palabra komo un spiértamentu kontra e servisio di Satanas.

Lo nos no apresiá e misericordia di Dios?

Kiko mas E por a hasi? Laga nos uni ku Esun ku a stima nos. Laga nos probechá di e medionan ku El a pone na nos fabor pa nos wórdu transformá na Su semehansa, pa restourá nos komunion ku angelnan ministradó, i pa drenta bék den armonia i komunion ku e Tata i e Yu.

AREPENTIMентU

KON UN HENDE por ta hustu ku Dios? Kon por wórdu hustifiká?

Solamente pa medio di Kristu nos por pone nos mes den armonia ku Dios i ku santidat; pero kon nos mester yega serka Kristu? Hopi hende ta hasi mes un pregunta ku e multitud a hasi dia di Pentekostes, ora, konvensi di nan piká nan a puntra: «Kiko nos mester hasi?» E promé palabra di Pedro su kontesta tabata, «Arepenti» (Echonon 2:37, 38). Poko despues, na otro okashon, el a bisa, «Arepenti boso... i komberti boso, pa boso piká wórdu pordoná.» (Echonon 3:19).

Arepentimentu ta nifiká ku ta duel hende ku el a peka, i e ta disidi di bandoná piká. Nos lo no renunsiá piká a ménos ku nos mira ku piká ta malu; te ora ku nos no sak'é for di nos kurason, lo no tin kambio den nos bida.

Tin hopi hende ku ta faya di komprondé kiko ta nifiká arepentimentu berdadero. Hopi ta tristu pasobra nan a hasi piká, i asta nan ta hasi un reforma parti pafó, pasobra nan tin miedu ku nan mal bida lo trese algun kastigu riba nan. Ma esei no ta arepentimentu manera Beibel ta bisa. Nan ta lamentá e kastigu, na lugar di lamentá e piká. Esei tabata e duele di Esau ora ku el a pérde e derechu komo promé yu. Balaam a spanta pa e angel ku tabata pará den su kaminda ku un spada den su man, el a rekonosé su falta pa miedu ku e lo mester pérde su bida; pero esei no tabata un

KAMINDA NA KRISTU

berdadero arepentimentu di piká, e no a kambia di propósito, i no a odia e malu. Hudas Iskariot, despues di traishoná su Señor, a bisa, «Mi a peka entregando sanger inosente.» (Mateo 27:4).

E konfeshon aki a wórdu ranká for di su alma kulpabel pa un tremendo sintimentu di kondenashon i un angustia pa e huisio ku e lo tin ku enfrentá den futuro. El a spanta pa e konsekuensianan ku e lo tin ku bai kosechá, ma su kurason no a kibra, i e no tabatin duele den su alma pa motibu ku el a traishoná e Yu sin kulpa di Dios, i a nenga e Santu di Israel. Ora ku Faraon tabata sufriendo di e huisio di Dios, el a rekonosé su piká pa e por a skapa mas kastigu, pero despues el a bolbe desafiá shelu ora ku e plaganan a stóp. Tur e hendenan aki tabata yora resultado di e piká, ma nan no tabata sinti duele pa e piká mes.

Pero ora ku e kurason obedesé na influensia di Spiritu di Dios, konsenshi ta spiérta, i e pekador lo kapta algu di e profundidat i santidat di e sagrado lei di Dios, fundeshi di Su gobiérnu den shelu i riba tera. E «Lus berdadero ku ta lusa tur hende ku ta bini den mundu,» ta iluminá e partinan sekretu di e alma, i e kosnan skondi di skuridat ta bini na kla. (Juan 1:9). Konvikshon ta tuma poseshon di e mente i kurason. E pekador tin un sentido di e hustisia di Jehova, i tin terror pa aparesé, den su mes kulpa i susedat, dilanti Esun ku ta listra tur kurason. E ta mira e amor di Dios, e bunitesa di santidat, e goso di puresa; e ta anhelá pa wórdu purifiká, i pa su komunion ku Shelu wórdu

AREPENTIMUNTU

restourá.

E orashon di David despues di su kaida, ta ilustrá e naturalesa di tristesa berdadero pa piká. Su arepentimentu tabata sinsero i profundo. E no a trata di diskulpá su krimen i su orashon no a wórdú inspirá dor di ningun deseo di skapa for di huisio ku tabata menas'é. David a mira kon grandi su kulpa tabata, el a mira e kontaminashon di su alma; e tabata odia su piká. No solamente e tabata pidi pordon, sino e tabata pidi tambe pa su kurason ta puru. E tabata anhelá e goso di santidat — pa bolbe na armonia i komunion ku Dios. Su alma tabata bisa esaki:

«Felis t'esun ku su eror ta pordoná, kende su piká ta tapá.

Felis ta e hende ku Señor no ta tuma su krimen na kuenta, den kende su sinti no tin engaño.

(Salmo 32:1.2).

«Tene piedat di mi, O Dios, den Bo bondat, den bo inmenso kompashon kita mi falta...

Pasobra mi sa ku mi a faya, mi piká ta semper mi dilanti.

Purifiká mi ku hisopo i lo mi ta puru; labá mi, i lo mi ta mas blanku ku sneu...

Krea den mi un kurason limpi, O Dios, i hinka un spiritu nobo i fiel den mi paden.

No tira mi leu di Bo kara,

no kita bo Spiritu Santu fo'i mi. Dunami atrobe e alegria di Bo

KAMINDA NA KRISTU

salbasyon, laga Bo Spiritu generoso ta mi forsa...

*Librami di delitu di sanger, O Dios, e Dios di mi
salbasyon,*

Anto mi lenga lo gaba Bo hustisia.» (Salmo 51:1-14).

Pa hasi un arepentimentu asina ta mas ayá di alkanse di nos mes poder; esei nos por haña solamente di Kristu ku a subi den altu i a duna donnan na hende. Esaki ta presis e punto riba kua hopi hende ta faya, i pa esei nan no ta risibi e ayudo ku Kristu ke duna nan.

Nan ta pensa ku nan no por bini serka Kristu a ménos ku nan arepentí promé, i ku arepentimentu ta prepará nan pa nan pikánan wórdu pordoná. Ta bérdat ku arepentimentu ta bini promé ku pordon di pikánan; pasobra ta solamente e kurason kibrá i tristu ta esun ku ta sinti nesidat di un Salbador. Ma un pekadór tin ku warda te ora ku el a arepentí promé ku e por bini serka Hesus? Arepentimentu mester bira un opstákulo entre e pekadór i e Salbador?

Beibel no ta siña nos ku un pekadór mester arepentí promé ku e aseptá e invitashon di Kristu, «Bini serka Mi tur ku ta kansá i kargá, i Ami lo duna boso deskanso.» (Mateo 11:28). Ta e birtut ku ta sali for di Kristu, ta guia na berdadero arepentimentu. Pedro ta mustra esei den un manera masha kla na e Israelitanan ora ku el a bisa: «T'É Dios a alsa na un lugá di honor na Su man drechi komo Guia i Salbador, pa komberti e

AREPENTIMENTU

hendenan di Israel i pordoná nan piká.» (Echonan 5:31). Mes imposibel ta pa arepentí si e Spiritu di Kristu no spiérta e konsenshi manera ta pa haña pordon sin Kristu.»

Kristu ta e fuente di tur bon impulso. E ta e uniko ku por implantá enemistat kontra piká den kurason di hende. Tur deseo pa bérdat i puresa, tur konvikshon di nos mes pekaminosidat, ta mustra ku Su Spiritu ta moviendo riba nos kurasonnan.

Hesus a bisa, «Ora ku alsa Mi riba tera, lo Mi hala tur hende serka Mi.» (Juan 12:32).

Kristu mester wórdu revelá na e pekadornan komo e Salbador muriendo pa e pikánan di mundu; i segun nos ta wak e Lamchi di Dios riba e krus di Kalvario, e misterio di redenshon ta kuminsá revelá su mes na nos mente, i e bondat di Dios ta guia nos na arepentimentu. Ora Kristu a muri pa pekadornan, El a manifestá un amor ku ta difisil pa nos komprondé, i segun e pekadornan kontemplá e amor aki, esaki ta molia e kurason, e ta impreshoná e mente, i ta duna e alma duele ku el a peka.

Ta bérdat ku hende algun bes tin bérgwensa di su pikánan, i ta bandoná algun di su kustumbenan malu, promé ku nan ripará ku nan a wórdu atraé na Kristu. Ma ki ora ku nan hasi un esfuerso pa reformá, for di un sinsero deseo pa hasi loke ta korekto, ta e poder di Kristu ta atrayendo nan. Un influencia ku nan mes ta inkonsiente di dje ta trahando riba e alma, e konsenshi ta spiérta, i nan kondukta parti pafó ta kambia. I segun Kristu ta

KAMINDA NA KRISTU

atraé nan pa wak na Su krus, pa mira Esun ken a wórdu borá pa nan pikánan, e mandamentu ta spiérta nan konsenshi. E maldat di nan bida, e piká ku a kohe rais den nan alma, ta wórdu revelá na nan. Nan ta kuminsá komprondé algu di e hustisia di Kristu, i nan ta sklama, «Ta kiko piká ta, pa el a eksigi tal sakrifisio pa redenshon di su viktima? Tur e amor aki, tur e sufrimentu aki, tur e umiyashon aki a wórdu demandá, pa nos no bai pérdi, ma haña bida eterno?»

E pekador por resisti e amor aki, e por nenga di wórdu atraé na Kristu, ma si e no resisti, Hesus lo hal'é serka djE; un konosimentu di e plan di salbashon lo gui'é na pia di e krus den arepentimentu pa su pikánan, ku a kousa sufrimentu na e Yu stimá di Dios.

Mes un mente divino ku ta trahando riba e kosnan di naturalesa ta papiando na e kurason di hende, i ta krea un anhelo ku nan no por splika, pa algu ku nan no tin. Kosnan di mundu no por satisfasé nan anhelo. E Spiritu di Dios ta rogando ku nan pa buska e uniko kosnan ku por duna nan pas i deskanso — e grasia di Kristu, e goso di santidat. Dor di influensianan visibel i invisibel, nos Salvador ta trahando konstantemente pa atraé e mente di hende for di plasernan di piká ku no ta satisfasé e alma pa nan buska bendishonnan ku no ta kaba nunca, kua nan por haña serka djE. Na tur e almanan aki, ku enbano ta bebe awa for di tanki kibrá di mundu, e mensahe divino ta bini, «Laga esun ku tin set bini; i es ku ke awa ku ta

AREPENTIMENTU

duna bida, bini numa i tum'é, pórna da.» (Revelashon 11:17).

Boso nan ku den boso kurason ta anhelá algu mihó di loke e mundu aki por duna boso, rekonosé e anhelu aki komo e stém di Dios na boso alma. Pidi'É pa duna boso arepentimentu, pa E mustra boso Kristu den Su amor infinito i den Su puresa perfékto. Den bida di e Salvador e prinsipionan di Dios Su lei — amor pa Dios i amor pa hende— a risibi un ehempel perfékto. Aktonan di bondat i amor desinteresá tabata e bida di Su alma. Segun nos ta wak'E, segun e lus for di nos Salvador pasa riba nos, nos ta mira e korupshon di nos mes kurason.

Nos por chifla nos mes, manera Nikodemo, ku nos bida ta masha bon, ku nos karakter moral ta korekto, i pensa ku nos no tin nodi humiyá e kurason dilanti Dios, manera e pekadador komun: ma ora e lus di Kristu lusa den nos almanan, nos lo mira kon yen di piká nos ta; nos lo ripará kon egoista nos motibunan ta, i wak e enemistat ku nos tin kontra Dios; e enemistat ei ku a mancha tur e aktonan di nos bida. Anto nos lo sabi ku di bérdat nos propio hustisia ta manera pañanan shushi, i ku e sanger di Kristu so por hasi nos limpi for di e kontaminashon di piká i renobá nos kurason na Su mes semehansa.

Si un rayo di e gloria di Dios, si un chispa di e puresa di Kristu penetrá den e alma - e ta mustra nos ku doló tur mancha di piká ku tin, tur deformidat i defektonan di karakter humano. E

KAMINDA NA KRISTU

ta mustra e deseonan impuru, e infidelidat di e kurason, i impuresa di e boka.

E trabou desleal di e pekadór, hasiendó ménos kaso di e lei di Dios, ta keda habri dilanti su bista, i su spiritu ta afligi i sinti primi bou di e influensia penetrante di e Spiritu di Dios. E ta disgustá di su mes ora e mira e karakter puru i sin mancha di Kristu.

Ora profeta Daniel a mira e gloria ku tabata rondoná e mensahero selestial ku a wórdu mandá serka dje, el a sinti aplastá, rekonosiendo su mes debilidat i imperfekshon. Deskribiendo e efekto di e esena maravioso, el a bisa, «E ora ei mi forsa a bai, mi a bira blek blek, mi no a sobra ni un tiki energia mas.» (Daniel 10:8). E alma ku wórdu konmové asina'ki lo odia su egoismo i amor propio, i pa medio di e hustisia di Kristu e lo buska puresa di kurason ku ta na armonia ku e lei di Dios i ku e karakter di Kristu.

E apóstel Pablo ta bisa ku «loke ta hustisia di lei» — hasiendó referensia na trabounan eksterno, «niun hende no tin nada di remarká», ma ora ku el a komprondé e karakter spiritual di lei, el a mira su mes komo un pekadór. (Filipensenan 3:6). Husgá pa e léter di lei manera hende ta apliká esaki na bida ekstérno, el a stop di peka; ma ora el a wak den profundidat di su preseptonan santu, i el a mira su mes manera Dios ta mir'é, el a humiyá su mes profundamente i a konfesá su kulpabilidat. El a bisa, «Tabatin un tempu ku ami, tabata biba sin e lei, pero ora e mandamentu a bini, piká a lanta

AREPENTIMIENTU

kabes den mi i ami a muri.»

(Romanonan 7:9). Ora el a mira e naturalesa spiritual di e lei, i piká a muestra su mes den su forma berdadero, e idea bon ku e tabatin di su mes a disparsé.

No ta tur piká ta mes grandi pa Dios; tin gradonan di kulpabilidad segun Su opinion i tambe segun esun di hende; ma no importá kon chikitu e akto aki óf esun aya por parse den bista di hende, niun piká ta chikitu den bista di Dios. Huisio di hende ta parsial i imperfekto; ma Dios ta mira tur kos manera nan ta. E buraché ta wórdu despresiá i nan ta bisa ku su piká ta ten'é for di shelu, miéntras ku orguyo, egoismo, i kudishi ta pasa hopi bes sin hende ripará. Sin embargo, esaki ta pikánan ku ta spesialmente ofensivo pa Dios; pasobra nan ta kontrali di e bondat di Su karakter, kontrali di amor desinteresá ku ta e atmósfera mes di e universo ku no a kai den piká. Esun ku a kai den algun di e pikánan grandi por tin bergwensa i ta sinti su pobresa i nesesidat di e gracia di Kristu; ma esun orguyoso no ta sinti ningun nesesidat, i asina e ta sera su kurason kontra Kristu i kontra e bendishonnan infinito ku El a bin duna.

E pober publikano ku a resa, bisando, «Dios, tene misericórdia di mi un pekador!» tabata konsiderá su mes komo un hómber masha malbado, i otronan tambe tabata mir'é asina ei; ma el a sinti su nesesidat, i ku su karga di kulpa i bergwensa el a bini dilanti Dios, pidiendo Su misericórdia. (Lukas 18:13). Su kurason tabata

KAMINDA NA KRISTU

habri pa Spiritu Santu hasi den djé Su obra di grasia, i libr'é for di e poder di piká. E orashon di e Fariseo ku tabata gaba su mes a muestra ku su kurason tabata será kontra e influensia di Spiritu Santu. Pa motibu ku e tabata leu for di Dios, e no tabata komprondé su mes falta ku tabata kontrali na perfékshon di e santidat divino. E no a sinti ningun nesesidat, i e no a risibi nada tampoko.

Si boso mira boso piká, no kere ku boso por mehorá boso mes. Hopi hende tin ku ta pensa ku nan no ta suficiente bon pa nan por bai serka Kristu. Boso ta spera di mehorá boso mes pa medio di boso mes forsa? «Akaso un hende di koló por kambia su mes kueru, óf un leopardo por kambia su manchanan? Naturalmente ku nó! Asina boso tampoko por kambia, ku ta kustumbrá di hasi maldat.» (Jeremias 13:23). Solamente den Dios tin yudansa pa nos. No spera konvikshon mas fuerte, no spera mihó okashon, óf pa tin un karakter mas santu. Nos no por hasi nada di nos mes. Nos mester bai serka Kristu manera nos ta.

Pero no laga ningun hende gaña nan mes pensando ku Dios den Su gran amor i misericórdia lo salba tambe esnan ku ta nenga Su grasia. Por midi e eksesivo korupshon di piká solamente na lus di e krus. Ora ku hende pretendé ku Dios ta muchu bon pa tira e pekadornan afó, nan mester mira Kalvario. Si Kristu a tuma riba djE e estado di kondenashon kousá pa motibu di desobediensia, i a sufri na lugar di e pekadornan, esaki tabata pasobra no tabatin ningun otro manera pa medio di kua

AREPENTIMENTU

hende por ta salbá, pasobra sin e sakrifisio aki tabata imposibel pa rasa humano skapa di piká i pone nan mes den komunion ku sernan santu, tabata imposibel pa e bolbe partisipá di bida spiritual. E amor, sufrimentunan i morto di e Yu di Dios, tur ta testifiká di e teribel enormidat di piká i ta prueba ku no tin moda di skapa di su poder ni speransa di un bida superior, sino ta dor di sumishon di e alma na KRISTU.

Algun bes pekadornan opstiná ta ekskusá nan mes bisando di esnan ku ta pasa pa kristian: «Mi ta mes bon ku nan. Nan no tin mihó kondukta ku mi. Nan ta gusta plaser i nan gusta komplasé nan mes meskos ku mi.» Di e forma aki nan ta hasi di falta di otronan, un ekskü pa nan mes negligensia den nan debernan. Pero falta i pikánan di otro no ta hustifiká di nos, pasobra Dios no a duna nos un modelo humano ku defekto. Nos tin pa ehémpel e Yu di Dios, i esnan ku ta keha di mal bida di otronan ku ta pasa pa kreyente, ta esnan ku mester presentá un bida i un ehémpel mas nobel. Si nan tin un idea mas haltu di loke un kristian mester ta, nan piká no ta mas grandi? Nan sabi loke ta bon, sin embargo, nan ta nenga di hasi'é.

Tene kuidou ku tardamentu. No pone un banda e trabou di bandoná boso pikánan, i di buska puresa di kurason serka Hesus. Akinan ta kaminda miles i miles di hende a hasi fout, pa nan perdishon etérno. Mi no ta papia akinan di kon kórtiku i insigur bida ta; ma tin un peliger teribel— un peliger ku no ta wórdu komprondé

KAMINDA NA KRISTU

Sufisientemente — ora ku tarda na respondé na e stem suplikante di e Spiritu Santu di Dios, na preferá biba den piká; pasobra esaki ta realmente e tardansa. Piká., pa chikitu ku e ta parse, no mester konsinti'é, pasobra bo ta riskando un pérdida pa semper. Loke nos no vense, lo bai vense nos i ta trese nos destrukshon.

Adam i Eva a konvensé nan mes ku di un kos di asina poko importansia manera komementu di e fruta prohibi ta, lo no por a resultá e konsekuensianan teribel manera Dios a bisa nan. Ma e kos chikitu aki tabata faltamentu ku lei santu di Dios; i el a separá hende for di Dios, i a habri e portanan di morto i miseria grandi riba nos mundu. Siglo tras siglo a subi di nos tera un yoramentu sin fin di lamento, i hinter kreashon ta keña i sufri huntu bou di e karga teribel di doló, komo konsekuensia di desobedensia di hende. Shelu mes a sinti efektonan di lantamentu di hende kontra Dios. Kalvario ta dilanti nos komo un rekuerdo dje sakrifisio grandi ku mester a sosodé pa karga ku faltamentu di lei divino. No laga nos konsiderá piká komo un kos di poko importansia.

Kada akto di faltamentu ku lei, kada deskuido óf nengamentu di e grasía di Kristu, ta traha indirektamente riba nos: e ta hasi e kurason duru, strobando boluntad, i ta verdof nos pensamentu, i no solamente kitando nos gana di aseptá, sino tambe e ta hasi nos ménos kapas di aseptá e invitashon di Spiritu Santu di Dios.

Hopi hende ta trata di kalma nan konsenshi

AREPENTIMENTU

ku e pensamentu ku nan por kambia nan mal kondukta ora ku nan ke; ku nan por hunga ku e invitashonnan di misericórdia, ma tog sigui sinti su impreshonnan bes tras bes. Nan ta pensa ku despues ku nan menospresia e Spiritu di gracia, despues ku nan a pone nan influencia pa banda di Satanas, den un momentu di nesesidat teribel, nan lo por kambia nan kondukta. Pero esaki, nan no por logra asina fasilmente. Eksperensia i edukashon di hinter un bida, tin e karakter forma di tal manera, ku poko di nan ta deseá despues pa risibi e imágen di Hesus.

Hasta un rasgo malu so di e karakter, un deseo pekaminoso komplasé konstantemente, lo neutralisá a lo largo tur e poder di e evangelio. Kada bes ku hende entregá na piká, e ta mengua su gana pa bai serka Dios. E hende ku ta muestra un tribimentu negligente, óf un indiferensia laf pa bérdat divino, no ta hasi otro kos, sino kosechá loke el a planta. Den hinter Beibel no tin tahamentu mas teribel kontra kustumbrá di hunga ku maldat, ku e palabranan di e hómber sabi, ku a bisa ku e pekador «lo ta kohi ku e lasnan di su mes piká.» (Proverbionan 5:22).

Kristu semper ta dispuesto pa libra nos di piká, pero E no ta fórsa boluntat di hende; i si pa motibu di persistensia den piká, e boluntat mes inkliná su mes kompletamente pa hasi maldat, i nos no ta deseá di ta liber, si nos mes no kier aseptá Su gracia, kiko mas E por hasi? Nos a destrui nos mes pa motibu di nenga Su amor. «Ata aki, awor ta tempu

KAMINDA NA KRISTU

agradabel, ata awor, ta e dia di salbashon!» «Si bo tende Su stem awe, no sera boso kurason.» (2 Korintionan 6:2; Hebreonan 3:7, 8).

«Hende ta mira aparentia pafó, pero Dios ta mira den kurason,» den kurason di hende ku tin emoshonnan miksto di goso i tristesa, e kurason kaprichoso kaminda ta biba tantu kos impuru i engaño. (1 Samuel 16:7). Dios konosé motibunanan di e kurason, asta su intenshonnan i propósitonan. Bai serka dj'E ku bo alma manchá manera e ta. Hasi manera e Salmista, presentá bo kurason habri na e bista di Esun ku ta mira tur kos, bisando: «Saminá mi, o Dios, i konosé mi kurason, purba mi pa Bo sa mi pensamentunan, mira pa mi n' sigui mal kaminda, guia mi p'e kaminda eterno!» (Salmo 139:23, 24).

Hopi hende ta aseptá un religion intelektual, komo un forma di santidat, miéntras ku e kurason no ta limpi. Laga bo orashon ta, «Krea den mi, o Dios, un kurason limpi, i pone di nobo un spiritu rekto den mi.» (Salmo 51:10). Sea franko i leal ku bo mes alma. Sea mes diligente, mes tantu persistente, manera boso lo tabata si boso bida mortal tabata na peliger. Esaki ta algu ku mester disidi entre Dios i boso alma, i e ta un desishon pa eternidat. Un supuesto speransa, i nada mas, lo ta bo ruina.

Studia Palabra di Dios ku orashon. E Palabra ei ta presentá dilanti boso, den lei di Dios i den bida di Kristu, e gran prinsipio di santidat, sin esei «ningun hende lo no mira Dios.» (Hebreonan 12:14). E ta

AREPENTIMUNTU

konvensé di piká; e ta muestra e kaminda di salbasyon den forma kla. Pone atenshon na dje manera ta e bos di Dios ku ta papia na bo alma.

Ora ku bo mira kuantu piká bo tin, ora ku bo mira kon bo ta den realidat, no bira desesperá. Pasobra ta e pekadornan Kristu a bin salba. Nos no tin di rekonsiliá Dios ku nos, ma - O maravioso amor! — Dios den Kristu ta «rekonsiliando e mundu ku Su mes.» (2 Korintionan 5:19). Pa medio di Su tierno amor E ta atrayendo na E mes e kurasonnan di Su yunan ku a dualu. Ningun tata terenal por tin mes tantu pasenshi ku e faltanan i kibukashonnan di su yunan, manera Dios tin ku esnan ku E ta buska pa salba. Ningun hende por roga i razoná mas tiernamente ku e pekadornan. Nunka boka di hende por a hasi invitashon mas tierno ku esnan ku Dios ta dirigi na esnan ekstraviá. Tur Su promesanan, tur Su spiértamentunan, no ta nada mas sino e ekspreshon di Su amor puru.

Ora Satanas bin bisa bo ku bo ta un gran pekadornan, hisa kara mira na bo Redentor, i papia di Su meritonan, loke lo yuda bo ta pa wak na Su lus. Rekonosé bo piká, ma bisa e enemigu ku «Kristu Hesus a bin na mundu pa salba pekadornan» i ku bo por ta salvá dor di Su amor inkomparabel. (1 Timoteo 1:15).

Hesus a hasi Simon un pregunta tokante e dos debedónan. E di promé tabata debe su shon un suma chikitu i e di dos un suma masha grandi; ma e shon a pordoná tur dos su debe, i Kristu a

KAMINDA NA KRISTU

puntra Simon kua dje debedónan ta stima su señor mas. Simon a kontestá: «Esun ku El a pordoná mas.» (Lukas 7:43). Nos tabata gran debedó, pero Kristu a muri pa nos por ta pordoná. E méritonan di Su sakrifisio ta basta pa presentá nan na e Tata na nos favor. Esnan ku El a pordoná mas lo stim'É mas, i nan ta pará mas serka di Su trono pa alab'E pa Su gran amor i sakrifisio infinito. Ta ora nos komprondé klaramente e amor di Dios, nos ta realisá mas mihó e pekaminosidat di piká. Ora nos mira largura di e kadena ku a laga baha abou pa reskatá nos, ora nos komprondé algu di e gran sakrifisionan ku Kristu a hasi na nos favor, nos kurason ta dirti ku ternura i duele ku nos a ofendé Dios.»

KONFESHON

ESUN KU skonde su faltanan lo no prosperá; Pero esun ku konfesá nan, i bandoná nan, lo risibi misericordia.» (Proverbionan 28:13).

E kondishonnan indiká pa haña misericordia di Dios ta simpel, hustu i razonabel. Señor no ta pidi nos pa hasi algun kos penoso pa nos por haña pordon di nos piká. Nos no tin nodi hasi peregrinashon largu i kansá, ni hasi ningun penitensha duru, pa nos por konfia nos alma na e Dios di shelu òf pa drecha nos faltanan; pero esun ku konfesá su piká lo risibi misericordia.

E apóstel ta bisa, «Konfesá boso pikánan na otro i resa pa boso haña kura.» (Santiago 5:16). Konfesá boso pikánan na Dios ken ta e uniko ku por pordoná nan, i boso faltanan un na otro. Si bo a hasi un malu na bo amigu òf bisiña òf bo a ofend'é, bo tin ku rekonosé bo falta, i ta su deber pa pordona bo libremente. Despues bo tin ku pidi Dios pordon, pasobra e ruman ku bo a ofendé ta propiedat di Dios, i haciendo daño na dje bo a peka kontra di su Kreador i Redentor. E kaso ta wòrdu presentá dilanti e uniko berdadero Mediador, nos gran Sumo Saserdote Kristu Hesus, ken «tabata pone na prueba den tur sentido, presisamente meskos ku nos. Pero E no a peka i «ku ta kapas di kompadesé di nos debilidatnan,» i ta kapas di hasi nos limpi di tur mancha di piká. (Hebreonan 4:15).

Esnan ku no a umiyá nan alma dilanti Dios

KAMINDA NA KRISTU

rekonosiendo nan kulpa, no a kumpli ainda ku e promé kondishon di aseptashon. Si nos no a eksperensia e arepentimentu ei di kua niun hende mester lamentá ku el a hasi'é, si nos no a konfesá nos pikánan ku berdadero umiyashon di e alma i kibramentu di spiritu, odiando nos maldat, nos nunca a buska berdaderamente e pordon di nos pikánan; i si nos nunca a buska, nos nunca a risibi e pas di Dios. E uniko rason pakiko nos no a risibi pordon pa nos pikánan di pasado ta pasobra nos no kier baha nos kurason, i kumpli ku e kondishonnan di e Palabra di bérdat. Splikashonnan presis ta wórdu duná tokante e asunto aki. Konfeshon di piká, sea e ta publiko óf den privá, mester ta di kurason i boluntario. No mester ranka nan for di e pekador. Nos no mester hasi'é di un manera lihé i deskuidá óf eksigi esei for di esun ku no konosé e karakter hororoso di piká. E konfeshon ku ta sali for di e alma ta subi na Dios, ku tin piedat sin fin. E Salmista ta bisa, «Señor ta serka di esnan ku tin kurason kibrá, i E ta salba esnan ku tin spiritu afligi.» (Salmo 34:18). Konfeshon berdadero semper ta spesifiko i ta rekonosé pikánan partikular. Nan por ta di tal naturalesa ku nan mester wórdu tresé dilanti Dios so. Nan por ta faltanan hasi na otro hende, ku nos mester konfesá na esnan ku a sufri e daño, nan por ta di karakter publiko i den e kaso aki mester konfesá nan publikamente. Ma tur konfeshon mester ta defini i dirékt, rekonosiendo e pikánan di kua nos ta kulpabel.

KONFESHON

Den e dianan di Samuel, e Israelitanan a alehá nan mes for di Dios. Nan tabata sufriendo e konsekuensianan di piká, pasobra nan a pérdé nan fe den Dios, nan a pérdé e kompromementu di Su poder i sabiduria pa goberná e nashon, nan a pérdé konfiansa den e kapasidat di Dios pa defendé nan kousa. Nan a bira lomba pa e gran Gobernante di universo, i nan a deseá di wórdu goberná manera e otro nashonnan rònt di nan. I promé ku nan a haña pas, nan a hasi e konfeshon definitivo aki: «Pasobra ademas di tur nos pikánan, nos a hasi mas maldat di pidi un rei pa nos.» (1 Samuel 12:19). Nan mester a konfesá i bisa presis ta kua piká nan a hasi. Nan ingratitut tabata primi riba nan alma, i apartá nan for di Dios.

Dios no ta aseptá konfeshon sin arepentimentu sinsero i kambio. Mester tin kambio desidi den e bida; nos mester laga un banda tur loke ta ofendé Dios. Esei lo ta resultado di un berdadero tristesa pa piká. Loke nos tin ku hasi ta pone kla nos dilanti: «Bai laba boso kurpa hasi'é limpi, kita boso maldatnan fo'i Mi bista, stóp di hasi malu! Siña hasi bon: respetá derecho di hende, pone probechadó hasi loke ta drechi, duna wérfano su derecho, sali na defensa di biudanan.» (Isaias 1:16, 17). «Si e ladron debilbé e prenda; e paga tur loke el a hórta; e biba segun lei ku ta duna bida i no hasi piká mas; e ora ei lo e keda na bida sigur, lo e no muri.» (Ezekiel 33:15). Pablo ta bisa, papiando di arepentimentu: «Boso tristesa tabata di un manera ku ta agradá Dios i mira e resultado awor!

KAMINDA NA KRISTU

Mira kuantu zelo boso a mustra, kon boso a defendé boso mes i mustra indignashon! Mira boso ansha, boso deseo profundo..., boso esfuerso i boso manera di kastigá maldat! Den tur forma boso a demostrá ku boso no tin falta mas den e asunto aki.» (2 Korintionan 7:11).

Ora ku piká a floha e sintimentu moral, esun inhustu no ta distingui e defektonan di su karakter, ni e no ta komprondé enormidat di e malu ku el a hasi, i a ménos e entregá su mes na e poder di e Spiritu Santu ku ta konvensé, e ta keda pa un parti siegu sin mira su piká. Su konfeshonnan no ta sinsero ni di kurason. Kada bes ku e rekonosé su maldat e ta trata di eskusá su kondukta, bisando ku si no tabata pa sierto sirkunstansia, e lo no a hasi esaki óf esaya, pa kua ta reprendé.

Despues ku Adam i Eva a kome di e fruta prohibi, nan a sinti miedu i bérgwensa.

Na prinsipio nan tabata pensa solamente kon nan por ekskusá nan piká i skapa di e teribel sentensia di morto. Ora ku Señor a puntra tokante nan piká, Adam a respondé tirando parti di e falta riba Dios i otro parti di e falta riba su kompañera: «E muhé ku bo a dunami pa ta huntu ku mi a dunami dje palu, i mi a kome.» E muhé a tira falta riba e kolebra, bisando, «E kolebra a gaña mi i mi a kome.» (Genesis 3:12, 13). Ta dikon Bo a traha e kolebra? Pakiko Bo a pèrmiti'é drenta den Eden? Esakinan tabata e preguntanan enserá den su éusküs pa su piká, hasiendo Dios responsabel di nan kaida. E spiritu di hustifiká nan mes a kuminsá

KONFESHON

ku e Tata di mentira, i tur e yunan hómber i yunan muhé di Adam a manifestá esei. Konfeshon dje manera aki no ta inspirá pa e Spiritu Divino, i Dios no ta aseptá nan. E arepentimentu berdadero ta hasi ku hende ta rekonosé su mes maldat, sin engaño ni hipokresia. Manera e pober publikano, ku no a riska alsa su wowo na shelu, lo e bisa, «Dios, tene misericórdia di mi, un pekadór;» i esnan ku rekonosé nan falta lo ta hustifiká; pasobra Señor Hesus lo presentá Su sanger na fabor di e alma arepentí.

E ehémpelnan ku Palabra di Dios ta duna di arepentimentu i humiyashon berdadero ta revelá un spiritu di konfeshon, ku no ta buska ékskus pa piká ni intentá di hustifiká su mes. Apóstel Pablo no a purba defendé su mes; el a pinta su piká manera e ta, sin intentá di skonde su culpa. El a bisa: «Ku outorisashon di e saserdotenan importante mi a hinka hopi kreyente den prizón; mi tabata duna mi aprobashon ora tabata mata nan. Den tur snoa mi tabata kastigá nan frekuentemente i tabata purba fórsa nan blasfemá Dios dor di nenga nan fe. Loko di rabia mi a asta persigui nan den siudatnan pafó di nos pais.» (Echonan 26:10, 11). Sin duda el a deklará ku «Kristu Hesus a bini den mundu pa salba pekadornan, di kua ami ta e promé.» (1 Timoteo 1:15).

E kurason umilde i kibrá, someté ku genuino arepentimentu, lo apresιά algu di e amor di Dios i di e preis di Kalvario; i manera un yu ta konfesá

KAMINDA NA KRISTU

su falta na su tata ku ta stim'é, asina tambe esun ku a arepentí di kurason lo trese tur su pikánan dilanti Dios. Ta pará skirbi, «Si nos atmiti nos pikánan abiertamente, Dios ku ta fiel i hustu ta pordoná nos e pikánan ei i purifiká nos di tur tur maldat.» (i Juan 1:9).

KONSAGRASHON

Dios Su promesa ta, «Si boso buska Mi di hinter boso kurason, boso ta haña Mi tambe.» (Jeremias 29:13)

HINTER e kurason mester wórdu duná na Dios, sino, di otro manera e kambio ku lo mester tuma lugá den nos, i pa kua nos mester ta transformá na Su semehansa, nunca lo tuma luga. Pa naturalesa nos ta leu di Dios. E Spiritu Santu ta deskribi nos kondishon ku e palabranan aki: «Morto pa motibu di boso aktonan di desobedensia i boso pikánan,» (Efesionan 2:1); i «Ya kabes ta tur na herida, kurason ta tur debilitá,» «no ta keda nada sano mas den dje.» (Isaias 1:5, 6). Nos ta pegá den e trampa ku diabel a gara nos aden pa pone nos hasi loke e ke.» (2 Timoteo 2:26). Dios ta deseá di kura nos, di libra nos. Ma esaki ta eksigi un transformashon i entrega kompletu na djE

E guera kontra nos mes ta e guera mas grandí ku hende tin ku bringa kontra dje. Pa someté nos mes, pa entregá tur na e boluntat di Dios, ta rekeri un lucha; ma e alma tin ku someté su mes na Dios promé ku e wórdu renobá na santidat.

E gobiérnu di Dios no ta fundá, manera Satanas kier laga parse, riba un sumishon siegu, riba un kontrol irasonabel. E ta apelá na e intelektu i na e konsenshi. E Kreador Su invitashon ta: «Bini, laga nos ban pleita e kaso» óf manera otro vershon ta pone «Bin, laga nos razoná huntu» (Isaias 1:18). Dios no ta fórsa e boluntat di Su kriaturanan. E

KAMINDA NA KRISTU

no por aseptá ningun homenaje ku no ta boluntario i inteligentemente hasi. Un obedensia fórsá lo stroba tur desaroyo real di mente óf karakter; e lo hasi hende un simpel robot. Esei no ta propósito di e Kreador. E ta deseá pa hende, ku ta e obra maestro di Su poder kreativo, alkansá nivelnan di mas haltu di desaroyo. E ta presentá nos dilanti e alturanan di bendishon kaminda E kier alsa nos pa medio di Su gracia. E ta invitá nos pa entregá nos mes na dj'E, pa E por kumpli Su boluntad den nos. Ta keda na nos pa skohe i disidi si nos kier ta liber di sklabilitut di piká, i komparti libertat glorioso komo yunan di Dios.

Ora ku nos konsagrá nos mes na Dios, nos mester renunsiá tur loke ta separá nos di dj'E. P'esei nos Salvador a bisa, «Kualkier un di boso ku no renunsiá tur loke e tin no por ta Mi disipel.» (Lukas 14:33). Nos mester bandoná tur kos ku ta tene nos leu di e kurason di Dios. Mamon óf rikesa, ta e dios falsu di hopi hende. Amor pa plaka i deseo di rikesa, ta e kadena di oro ku tin nan mará na Satanas. Otro ta adorá fama i honor di mundu. Un bida di komodidat egoista i liber di responsabilidat ta e idolo di otronan. Pero nos mester kibra e fahanan aki di sklabilitut. Nos no por konsagrá un parti di nos kurason na Dios i e otro parti na mundu. Nos no por ta yunan di Dios, a ménos ku nos ta esei kompletamente.

Tin esnan ku ta profesá ku nan ta sirbi Dios, miéntras nan ta dependé riba nan mes esfuersonan pa obedesé Su lei, pa forma un karakter rekto i

KONSAGRASHON

sigurá nan salbashon. Nan kurason no ta konmovi pa niun sentido profundo di e amor di Kristu, ma nan ta lucha pa kumpli ku e debernan di bida Kristian komo si fuera esei ta loke Dios ta rekeri di nan pa nan gana shelu. Nan ta totalmente ekibuká. Un religion asina no ta bal nada. Ora Kristu ta biba den e kurason, e alma lo ta asina yen di Su amor, asina yen ku e goso di komunión ku n'E; ku e lo tene duru na dj'E; i segun e hende ta kontemplá Kristu, e ta lubidá su mes. Amor pa Kristu ta fuente di tur bon obra. Esnan ku ta sinti e amor di Dios, no ta puntra kuantu ta di ménos ku Dios ke pa nan hasi; nan no ta puntra ta kua ta e midi mas about ku Dios ta aseptá, sino ku nan ta deseá un bida di konformidat kompleto na boluntat di nan Redentor. Ku gran deseo nan ta entregá tur kos, i ta muestra un interes segun balor di e opheto ku nan ta buska. Profesá di pertenesé na Kristu sin e amor profundo aki, ta palabra so, formalidat seku, i no ta bal nada.

Boso ta kere ku ta un sakrifisio muchu grandi pa duna Kristu tur kos? Puntra boso mes esaki, «Kiko Kristu a duna pa mi?» E Yu di Dios a duna tur kos — bida i amor i sufrimentu — pa nos redenshon. I por ta posibel ku nos, sernan humano ku no ta digno di tantu amor, por nenga di entreg'E nos kurason? Kada momentu di nos bida nos a tuma parti den bendishonnan di Su gracia, i pa e mes motibu aki nos no por komprondé bon kla e profundidat di ignoransia i miseria for di kua nos a wórdu salbá. Por ta posibel ku nos ta mira Esun

KAMINDA NA KRISTU

ken nos pikánan a bora, i nos ta sigui, sin embargo, menospresiando tur Su amor i sakrifisio?

Mirando e gran humiyashon di e Señor di gloria, nos ta murmurá pasobra nos no por drenta bida sino pa medio di konflikto i humiyashon di nos mes?

Hopi kurason orguyoso ta puntra, «Pakiko nos mester arepentí i humiyá nos mes promé ku nos por tin seguridat di nos aseptashon dilanti Dios?» Mira na Kristu. E tabata sin piká, i mas ku esaki, e tabata e Prens di shelu; pero pa motibu di hende El a bira piká pa e rasa. «El a entregá Su bida te na morto i laga nan tum'É pa malbado, ora en realidat El a tuma piká di hopi hende riba Su lomba i a boga pa pekadornan». (Isaias 53:12).

Ma kiko nos ta bandoná, ora ku nos duna tur kos? Un kurason manchá dor di piká, pa Hesus purifiká, pa hasi limpi ku Su mes sanger, i pa E salbé ku Su amor inkomparabel. I sin embargo, hende ta haña ku ta difisil pa renunsiá tur kos. Ta bérgwensa pa tende nan bisa esei.

Dios no ta eksigi pa nos renunsiá nada ku ta pa nos mayor probecho retené. Den tur loke E hasi E tin e bienestar di Su yunan na bista. Mare tur esnan ku no a skohe Kristu ainda por a komprondé ku E tin algu muchu mas mihó pa ofresé nan di loke nan ta buskando pa nan mes. Hende ta hasiendo mayor daño i inhustisia na su mes alma ora ku e pensa i aktua kontrali na e boluntat di Dios. Ningun goso berdadero por wórdu hañá den e kaminda prohibi dor di Esun ku sabi kiko ta mas

KONSAGRASHON

mihó, i ku ta plania pa e bienestar di Su kriaturanan. E kaminda di piká ta e kaminda di miseria i destrukshon.

Ta un engaño si nos pensa ku Dios ta kontentu pa E mira Su yunan sufri. Shelu hinter ta interesá den felisidat di hende. Nos Tata Selestial no ta sera e kaminda di alegria pa ningun di Su kriaturanan. E palabra divino ta manda nos hui for di tur e plasernan ku ta trese sufrimentu i desapuntamentu, ku ta sera pa nos e porta di felisidat i di shelu.

E Redentor di mundu ta aseptá hende manera nan ta, ku tur nan nesesidatnan, imperfekshon i debilidatnan; i no solamente E ta purifiká nan di nan pikánan, i duna nan redenshon dor di Su sanger, sino E lo satisfasé e anhelo di tur ku konsenti pa karga Su yugo i Su karga. Ta Su propósito pa duna pas i deskanso na tur esnan ku bini serka dj'E pa e pan di bida. Solamente E ta pidi nos pa hasi e debernan ku ta guia nos stapnan na alturanan di felisidat etérno unda e desobedientenan no por yega. E berdadero bida i goso di e alma ta di tin Kristu forma den dje, Kristu, e speransa di gloria.

Hopi hende ta bisa: «Ta kon mi tin ku someté mi mes na Dios?» Bo ta anhelá di hasi Su boluntad, pero bo ta debil den poder moral, bo tin duda i bo ta dominá pa kustumbènan di bo bida malu. Bo promesanan i resolushonnan ta kibra mes lihé ku hilu di araña. Bo no por kontrolá bo pensamentunan, bo impulsonan, bo afektonan.

KAMINDA NA KRISTU

Eksperensia di promesanan ku bo no a kumpli ku n'e, ta debilitá bo konfiansa den bo mes sinseridat, i ta hasi bo sinti ku Dios no por aseptá bo; pero no tin mester di desesperá.

Loke bo mester komprondé ta e forsa berdadero di boluntad. Esaki ta e poder ku ta goberná den naturalesa di hende, e poder di desishon, óf di skohe. Tur kos ta dependé di e akshon korekto di bo boluntad. Dios a duna hende e poder di skohe; ta dependé di nan mes pa us'é. Bo no por kambia bo kurason, ni bo mes no por duna su afektonan na Dios; pero bo por disidi di sirbi'E. Bo por dun'E bo boluntad, pa E por obra den bo, tantu na ke, komo na hasi conforme Su gustu. Di e manera ei hinter bo naturalesa ta bou di kontról di Spiritu di Kristu; bo afektonan lo ta sentrá riba dj'E, bo pensamentunan lo ta den armonia ku n'E.

Deseo di ta bondadoso i santu ta masha rekto; pero si bo yega solamente ei so, nan no ta di ningun probecho. Hopi lo bai pérdi miéntras nan ta spera i deseá di ta Kristian. Nan no ta yega na e punto di entregá nan boluntad na Dios. Nan no ta skohe pa ta Kristian awor.

Dor di uso korekto di bo boluntad, bo por hasi un cambio kompletu den bo bida. Dunando bo boluntad na Kristu, bo ta uni bo mes ku e poder ku ta obra riba tur dominio i poder. Lo bo risibi forsa for di haltu pa mantené bo firme, i asina dor di entrega konstante na Dios, lo bo ta kapas di biba e bida nobo, asta e bida di fe.

FE I ASEPTASHON

Despues ku bo konsenshi a biba di nobo pa medio di Spiritu Santu, bo ta mira algu di e malu di piká, di su poder, su kulpa, su miseria, i bo ta mir'é ku horror. Bo ta mira ku e piká a separá bo for di Dios, i ku bo ta bou di servisio di poder di malu. Kuantu mas bo lucha pa bo skapa di dje, mas bo ta komprondé ku bo mes no por hasi nada kontra. Bo motibunan no ta puru; bo kurason ta korumpi. Bo ta mira ku bo bida ta yen di egoismo i di piká. Bo ta anhelá pa bo ta pordoná, limpiá i liberá. E armonia ku Dios, pa ta semehante na dj'E,— kiko bo por hasi pa bo haña esei nan?

Loke bo tin mester ta pas, — shelu su pordon, pas i amor den bo alma. Bo no por kumpra nan ku plaka, inteligensia i sabiduria no por alkansá nan; nunca bo no por spera di haña nan ku bo mes forsa. Pero Dios ta ofresé nan na bo por nada, «sin plaka i sin preis.» (Isaias 55:1). E ta di bo, kon tal ku bo ke rék man i tum'é. Señor ta bisa: «Aunke boso pikánan ta korá, nan lo bira blanku manera sneu, aunke nan ta korá, nan lo keda manera lana.» (Isaias 1:18). «Tambe lo mi duna boso un kurason nobo i lo mi pone un spiritu nobo den boso.» (Ezekiel 36:26).

Bo a konfesá bo pikánan i bo a kita nan for di bo kurason. Bo a resolve di entregá bo na Dios. Bai serka dj'E, i pidi'E limpia bo di bo pikánan, i duna bo un kurason nobo. Kere ku lo E hasi'é pasobra El a priminti esei. Esaki ta loke Hesus a

KAMINDA NA KRISTU

siña hende durante e tempu ku E tabata den mundu, ku loke Dios a priminti nos, nos mester kere ku nos lo risibi i nos lo hañ'é. Hesus tabata kura enfermonan si nan tabatin fe den su poder; i yuda nan ku e kosnan ku nan por a mira mustrando nan pa nan kere den Su poder di pordoná piká.

El a mostra esaki tur kla den e kaso di e enfermo lam: «Pa boso sabi anto, ku e Yu di hende tin poder pa pordoná piká riba tera, (e disi anto na e hende lam): Lanta para, kohe bo kama i bai bo kas.» (Mateo 9:6). Asina tambe Juan e evangelista, papiando di e milagernan di Kristu, a bisa: «Ma esaki ta skirbi, pa boso kere ku Hesus ta e Kristu, e Yu di Dios, i keriendo, lo boso tin bida den Su nómbor.» (Juan 20:31).

For di e simpel kuenta di Beibel kon Hesus tabata kura enfermonan nos por siña algu di e manera di bai serka Kristu pa e pordoná nos nos pikánan. Awor nos ta mira e kaso di e hómber lam di Bethesda. E pober enférmo aki no por a hasi nada pa e mes; e no a usa miembronan di su kurpa durante trintiocho aña. Sin embargo, Hesus a bisé «Lanta riba, kohe bo kama i kana.» E lam por a bisa: «Señor, si bo kura mi promé anto lo mi obedesé Bo palabra.» Pero nada di esaki; el a kere den palabra di Kristu, el a kere ku e tabata kurá, i el a hasi esfuerso mes ora; e kier a kana i el a kana. El a konfia den Palabra di Kristu, i Dios a duna e poder. El a keda kurá.

Asina tambe abo ta un pekador. Bo no por kita

FE I ASEPTASHON

bo pikánan ku bo a hasi den pasado, bo no por kambia bo kurason, i hasi bo mes santu. Ma Dios ta priminti di hasi tur esaki pa bo dor di Kristu. Bo ta kere e promesa ei. Bo ta konfesá bo pikánan, i bo ta entregá bo mes na Dios. Bo ta deseá sirbi'É. Sea sigur ku mesora bo hasi esaki, Dios lo kumpli ku Su palabra na bo. Si bo kere e promesa — kere ku bo ta pordoná i hasi limpi — Dios ta hasi esei; bo ta kurá meskos ku Kristu a duna poder na e lam pa e kana ora ku e hómber a kere ku e tabata sano. Asina ta si bo ta kere.

No warda te ora ku bo sinti ku bo ta sano, pero bisa: «Mi ta kere; asina ta, no pasobra mi ta sinti'é, sino pasobra Dios a priminti'é.»

Hesus ta bisa: «Tur loke boso pidi, ora boso ta resa, kere ku boso ta risibi'é i boso lo haña nan.» (Markos 11:24). Tin un kondishon den e promesa aki — ku nos pidi conforme e boluntat di Dios. Pero ta e boluntat di Dios pa remove piká for di nos, hasi nos Su yunan i kapasitá nos pa biba un bida santu. Di manera ku nos por pidi Dios e bendishonnan aki, kere ku nos ta risibi nan i gradisi Dios pasobra nos a risibi nan Ta nos privilegio pa bai serka Hesus pa E hasi nos limpi, i para dilanti di lei sin bérgwensa ni remordimentu. «Asina ku awor no tin kondenashon mas pa esnan ku ta den Kristu Hesus, esnan ku no ta kana segun karni, ma segun e Spiritu.» (Romanonan 8:1).

Di manera ku ya bo no ta di bo mes mas: pasobra bo ta kumprá pa un preis. «Sabiendo ku no ta ku kosnan ku ta kaba, sea plata óf oro, boso

KAMINDA NA KRISTU

ta wordu liberá di boso manera nan banu di biba, ... ma pa medio dje sanger presioso di Kristu, komo di un Lamchi sin kulpa i sin mancha.» (1 Pedro 1:18, 19). Pa motibu di e simpel echu aki di kere Dios, e Spiritu Santu a kuminsá un bida nobo den bo kurason. Nos ta meskos ku un mucha nasí den famia di Dios, i E ta stima nos manera E ta stima Su Yu.

Awor ku bo a konsagrá bo mes na Hesus, no bolbe atras, no separá bo di djE, pero bisa tur dia: «Mi ta di Kristu; mi a entregá mi mes na djE;» i pidi' E pa E duna bo Su Spiritu, i warda bo pa medio di Su grasía. Komo bo a konsagrá bo na Dios i bo ta kere den djE, komo bo a bira Su yu, asina tambe bo mester biba den djE.

E apostel Pablo a bisa: «Meskos anto ku boso a risibi Kristu Hesus, e Señor, kana tambe asina den djE.» (Kolosenenan 2:6).

Tin hende ta kere ku nan mester ta na prueba, i ku nan mester muestra Señor ku nan a reformá, promé ku nan por konta ku Su bendishon. Pero nan por pidi bendishon di Dios awor mes. Nan mester tin Su grasía, e Spiritu di Kristu pa yuda nan den nan debilidadnan, pasobra di otro manera nan no por resistí malu. Hesus ke i E ta gusta pa nos bai serka djE manera nos ta, pekaminoso, ímpotente, dependiente. Nos por bai ku tur nos debilidad, nos ignoransia i maldat i kai arepentí na Su pia. Ta Su gloria pa sera nos den brasa di Su amor, mara nos heridanan i limpia nos di tur nos impuresa.

FE I ASEPTASHON

Miles di persona ta ekibuká nan den esaki: nan no ta kere ku Hesus ta pordoná nan personalmente, individualmente. Nan no ta kere tur kos ku Dios ta bisa. Ta e privilegio di tur esnan ku ta kumpli ku e kondishonnan, pa sabi pa nan mes ku pordon ta wórdú duná libremente pa kada piká. Pone un banda e sospecho ku Dios Su promesanan no ta pa bo. Nan ta pa tur pekadór arepentí. Kristu a duna forsa i grasia na e angelnan ministradó pa nan hiba esakinan na tur alma kreyente. Ningun hende ta asina malbado ku e no por haña forsa, puresa i hustisia den Hesus, ken a muri pa nan.

E ta sperando pa kita nan pañanan manchá i kontaminá ku piká, i bisti nan bisti blanku di hustisia; E ta roga nan pa biba i no presé.

Dios no ta trata nos manera hende finito ta trata otro. Su pensamentunan ta pensamentu di misericórdia, amor i tierno kompashon. E ta bisa: «Laga e malbado renunsiá su kaminda, i hende inhustu su pensamentu; lag'é bolbe na Señor, i lo e tin kompashon ku n'e; i na nos Dios, pasobra E lo pordon'é abundantemente.» «M'a laga bo rebeldianan disparsé manera nubia, bo pikánan manera neblina.» (Isaias 55:7; 44:22).

«Mi no ta kontentu ku morto di un hende ku mester muri, Señor a bisa. P'esei kombérti i keda na bida!» (Ezekiel 18:32). Satanas ta lihé pa kita e seguridat bendita ku Dios ta duna nos. E ta deseá di kita tur nos speransa' kada rayo di lus for di e alma; pero abo no mester lagu'é hasi esei. No tende e tentadó, pero bisa: «Hesus a muri pa ami por

KAMINDA NA KRISTU

biba. E ta stima mi i E no ke pa mi peresé. Mi tin un Tata selestial ku masha kompashon; i maske mi a abusá di Su amor, maske mi a tira afó e bendishonnan ku El a duna mi, mi ta lanta riba i bai serka mi Tata, i mi ta bis'E: «Tata, mi a peka kontra shelu i kontra bo; ya mi no ta digno mas pa wórdu yamá bo yu; hasi mi manera un di bo sirbidónan.»» Den e komparashon nos ta mira kon esun pérdi lo wórdu risibi: «I ora e tabata hopi leu di dje ainda, su tata a mir'é, i tabatin kompashon, i koriendo serka dje, el a bras'é i a sunchi'é.» (Lukas 15:18-20).

Pero asta e komparashon aki asina tierno i konmovedor, apénas ta ekspresá e kompashon infinito di nos Tata selestial. Señor ta deklará pa medio di Su profeta: «Ku amor etérno Mi a stima bo, p'esei ku ternura Mi a atraé bo.» (Jeremias 31:3). Ora ku e pekadador tabata ainda leu di kas di su Tata malgastando su plaka den un pais stranhero, e kurason di su Tata tabata anhelá di tin e serka, i kada deseo profundo ku hende tin pa bolbe serka Dios, ta simpelmente e tierno invitashon di Su Spiritu, ku ta buska, roga i atraé esun pérdi pa e bini bék kas serka su Tata.

Ku tantu promesa bunita di Beibel dilanti bo, lo bo por duda? Lo bo por kere ku ora e pober pekadador ta deseá di bolbe, deseá di renunsiá su pikánan, Señor lo nenga ora e bini arepentí di su pika? Laga e pensamentunan ei un banda! Nada por destrui bo alma mas ku tal idea di bo Tata Selestial. E ta odia piká, pero E ta stima e pekadador,

FE I ASEPTASHON

entregando Su Mes, den persona di Kristu, pa tur ku ke, por ta salvá i por tin bendishon etérno den reino di gloria. Ki palabra mas dushi o mas fuerte lo E por a usa pa muestra Su amor pa nos? E ta bisa: «Akaso un muhé por lubidá e yu na pechu, e por keda sin stima e yu di su mondongo? I si e yega na lubid'é mes, Ami si nunca lo lubidá bo!» (Isaias 49:15).

Alsa bo bista, abo ku ta duda i tembla; pasobra Hesus ta biba pa hasi interseshon pa nos. Duna danki na Dios pa Su Yu stimá ku El a duna, i roga ku E lo no a muri enbano pa bo. Su Spiritu ta invitá bo awe. Bini ku tur bo kurason serka Hesus i pidi Su bendishon.

Segun bo ta lesa e promesanan, kórda ku nan ta ekspreshon di un amor i un piedat ku no por splika ku palabra. E gran kurason di amor sin fin ta wórdu atraé na e pekador pa medio di un kompashon grandi. «Den ken nos tin salbashon pa medio di Su sanger, esta: pordon di pikánan.» (Efesionan 1:7). Si, kere so ku Dios ta bo yudadó. E ke restourá Su imágen moral den hende. Segun bo ta aserk'E ku konfeshon i arepentimentu, E ta aserka bo ku pordon i miserikórdia.

E PRUEBA DI TA DISIPEL

Si algun hende ta den Kristu, ta un kriatura nobo e ta: Loke ta bieu a pasa kaba; i ata, tur kos a bira nobo.» (2 Korintionan 5:17)

Tin bes hende no por bisa e tempu o lugá eksakto, ni kontu tur e kadena di sirkunstansianan den e proseso di kombershon, pero esaki no ta prueba ku e no a komberti. Kristu a bisa Nikodemo: «E bientu ta supla di unda ku e ke i bo ta tende su zonido, ma bo no sabi di unda e ta bini i na unda e ta bai; asina ta ku tur ku a nase di Spiritu.» (Juan 3:8). Asina manera nos no por mira aire, ku ta invisibel, i sin embargo, nos ta mira i sinti su efekto, asina Spiritu di Dios ta obra den kurason di hende. E poder regenerador ei ku ningun hende no por mira, ta pone un bida nobo den e alma; e ta krea un hende nobo den e imágen di Dios.

Maske e obra dje Spiritu ta silensioso i nos no por mir'é, su efekto ta bisto. Si e kurason a wórdu renobá pa Spiritu di Dios, e bida lo ta téstimonio di e echo ei. Miéntras nos no por hasi nada pa kambia nos kurason, ni pa pone nos mes na armonia ku Dios; maske ku nos no mester konfia pa nada den nos mes ni den nos bon obranan, nos bida lo muestra si grasia di Dios ta biba den nos. Hende ta ripará un kambio den nos karakter, den nos kustumbenan i okupashon. E kontraste lo ta kla i disidi entre loke nan tabata i loke nan ta awor. E karakter ta wórdu revelá, no pa e bon obranan o e

KAMINDA NA KRISTU

mal obranan ku di bes en kuando ta sosodé, sino pa e tendensia di e palabranan i aktonan kustumbrá den bida diario.

Ta bérdat ku por tin un korekshon ekterior di e komportamentu sin e poder regeneradó di Kristu. E amor di influensha i deseo di wórdu stimá dor di otronan por produci un bida masha ordená. Réspét propio por guia nos na evitá e aparsensia di maldat. Un kurason egoista por hasi bon obra. Dor di ki medio, anto, nos ta determiná di banda di ken nos ta?

Di ken nos kurason ta? Ku ken nos pensamentu ta? Di ken nos ta gusta papia? Pa ken nos amor i nos mihó energia ta? Si nos ta di Kristu, nos pensamentunan ta ku n'E, i nos pensamentunan mas dushi ta di djE. Tur loke nos tin i nos ta, nos a konsagrá na E. Nos ta deseá di ta meskos ku n'E, di tin Su Spiritu, pa hasi Su boluntad i agrad'E den tur kos.

Esnan ku bira kriaturanan nobo den Kristu Hesus ta mustra den nan mes e frutanan di Spiritu, «stimashon, alegria, pas, grandesa di ánimo, piedat, bondat, fieldat, suavedat di kurason, desensia (dominio propio).» (Galationan 5:22,23). Ya nan no ta konformá nan mes ku e deseonan malu di antes, sino pa medio di fe den e Yu di Dios nan ta sigui den Su stapnan, nan ta reflehá Su karakter, i nan ta purifiká nan mes asta manera E ta puru. E kosnan ku un tempu nan tabata odia, awor nan ta gusta; i kosnan ku otro tempu nan tabata gusta, awor nan ta odia. Esun ku tabata

E PRUEBA DI TA DISIPEL

orguyoso i térko, awor ta mansu i humilde di kurason. Esun ku antes tabata vanidoso i freipóstu, awor ta bira serio i prudente. E buraché no ta bebe mas i e hende korumpi moralmente awor ta puru. Nan a laga e kustumber i e maneranan malu di mundu un banda. Kristiannan no ta buska «e adórno parti pafó,» «sino for di loke boso tin den boso kurason, e bunitesa duradero di un spiritu suave i trankil. Ta e bunitesa ei ta esun di mas balioso den bista di Dios!» (1 Pedro 3:3,4)-

No tin siguransa di arepentimentu berdadero si esaki no muestra un cambio di bida. Si e pekadador restourá e promesa, si e duna bék e kos ku el a hórta, i konfesá su pikánan, i stima Dios i su próhimo, e pekadador por ta sigur ku el a pasa di morto pa bida.

Ora ku nos bini serka Kristu, hende pekadó manera nos ta, i nos tuma parti den su gracia pordonadó, den nos kurason ta nase amor p'E. Tur karga ta lihé: pasobra e yugo di Kristu ta suave. Nos debernan ta bira agradabel, i e sakrifisionan un alegria. E kaminda ku ántes tabata parse nos skur, awor ta bria ku rayonan di e Solo di Hustisia. E amabilidad di karakter di Kristu lo wórdu mustrá den esnan ku ta sigui'E. Tabata Su goso pa hasi boluntat di Dios. E poder di mas grandi den bida di nos Salvador tabata amor pa Dios i zelo pa Su gloria. Amor tabata hasi tur su akshonnan bunita i nobel. Amor ta di Dios. E kurason ku no a kombérti no por originá ni produci nan. Nan ta solamente den e kurason den kual Kristu ta. «Nos

KAMINDA NA KRISTU

ta stim'E pasobra El a stima nos promé.» (1 Juan 4:19). Den e kurason renobá dor di grasia divino, amor ta e prinsipio di akshon. E ta modifiká e karakter, e ta goberná e impulsanan, e ta kontrolá e pashonnan, e ta kalma enemistat, i ta enoblesé e afektonan. E amor aki kultivá den e alma, ta hasi bida dushi i ta ehersé un influensia refinadó riba tur esnan ku ta rónt di dje.

Tin dos eror kontra kua e yunan di Dios partikularmente esnan ku apénas a kuminsá konfia den Su grasia — mester warda nan espesialmente: Promé, ta esun ku hende ta fiha riba su mes obra, konfiando den un kos ku e por hasi, pa pon'é den armonia ku Dios. Esun ku ta buska moda di bira santu pa medio di su mes trabou wardando e lei, e ta buskando un kos imposibel. Tur loke hende por hasi sin Kristu ta kontaminá ku interes-propio i piká. Solamente grasia di Kristu pa medio di fe, ta loke por hasi nos santu.

E otro eror i no ménos peligroso ta ku, fe den Kristu ta hasi ku hende no tin nodi warda e lei di Dios; ku pasobra pa fe solamente nos a bira partisipante di grasia di Kristu, nos obra no tin nada di hasi ku nos salbashon.

Pero tene na kuenta ku obediensia no ta un simpel kumplimentu eksterno, sino un servisio di amor. Lei di Dios ta un ekspreshon di su mes naturalesa; ta un figura di e gran prinsipio di amor, i e fundamentu di Su gobiérnu den shelu i riba tera. Si nos kurason ta renobá na semehansa di Dios, si amor divino ta plantá den e kurason, lo nos no mira

E PRUEBA DI TA DISIPEL

tambe e lei di Dios den e bida? Ora ku e prinsipio di amor wórdu plantá den e kurason, ora ku hende ta renobá segun imágen di Esun ku a kreé, ta kumpli den dje e promesa di e aliansa nobo: «Lo Mi hinka Mi lei den nan kurason, i lo mi skirbi nan den nan sinti.» (Hebreonan 10:16). I si e lei ta skirbi den e kurason, lo e no modifiká e bida? Obedensia — e servisio i lealtat di amor — ta e prueba berdadero di un disipel. Siendo asina, Santa Skritura ta bisa: «Esaki ta e amor di Dios, pa nos warda Su mandamentunan.» «Ken ku bisa: Mi konos'É, i no warda Su mandamentunan, esei ta un mentiroso i no tin berdat den dje.» (1 Juan 5:3; 2:4). Enbes di libra hende for di obedensia, ta fe i fe solamente, loke ta hasi ku e persona por tin parti den grasía di Kristu, ken ta yud'é obedesé.

Nos no ta gana salbashon dor di nos obedensia; pasobra salbashon ta un regalú pórna di Dios, pa risibi pa medio di fe. Pero obedensia ta e fruta di fe. «I boso sabi, ku El a aparesé, pa kita piká, i den djE no tin piká. Tur ku permanesé den djE, no ta hasi piká. Tur ku hasi piká, no a mir'E, ni a konos'E.» (1 Juan 3:5,6).

Esaki ta e prueba berdadero. Si nos biba den Kristu, si e amor di Dios ta biba den nos, nos sintimentunan, nos pensamentunan, nos akshonnan lo ta den armonia ku boluntat di Dios manera e ta wórdu ekspresá den e preseptonan di Su lei santu. «Yu chikitu, no laga ningun hende gaña boso. Es ku praktiká hustisia, ta hustu meskos ku E tambe ta hustu.» (1 Juan 3:7).

KAMINDA NA KRISTU

Hustisia ta wórdu defini dor di e norma di Dios Su lei santu, manera e ta ekspresá den e dies preseptonan duná na Sinai.

E asina yamá fe den Kristu, ku ta profesá di libra hende for di obligashon di obediensia na Dios, no ta fe, ma presunshon. «Pasobra pa grasia boso ta salbá pa medio di fe.» Pero «fe, si e no ta kompañá ku obra, e ta morto riba su mes.» (Efesionan 2:8; Santiago 2:17). Hesus a bisa di Su mes promé ku El a bini na mundu: «Ku gustu Mi ta hasi Bo boluntat, O Mi Dios, i Bo lei ta den Mi kurason.» (Salmo 40:8). I ora E tabata kla pa subi bai shelu, El a bisa atrobe: «Mi a warda e mandamentunan di Mi Tata i a keda den Su amor.» (Juan 15:10).

Santa Skritura ta bisa: «I na esaki nos sabi, ku nos konos'E, si nos warda Su mandamentunan... Esun ku bisa ku e ta keda den djE, e mes mester kana tambe meskos, ku El a kana.» (1 Juan 2:3- 6). «Pasobra Kristu tambe a sufri pa boso, lagando un ehémpel pa boso, pa boso sigui den Su pasonan.» (1 Pedro 2:21).

Ata, Mi ta pará na porta i Mi ta bati.

Ora un hende tende mi stem i habri porta, lo Mi drenta serka dje i nos lo sinta kome huntú.»

Revelashon 3:20

E kondishon pa alkansá bida etérno awor ta eksaktamente meskos ku e tabata semper, — meskos ku e tabata den Paraiso promé ku e kaida

E PRUEBA DI TA DISIPEL

di nos promé tatanan, — obedensia perfékto na lei di Dios, hustisia perfékto. Si nos por a haña bida etérno via un medio mas fásil ku esaki, anto lo e por a pone na peliger e felisidat di mundu hinter. Lo e por a habri porta pa piká ku tur su konsekuensia di sufrimentu i miseria, pa semper. Adam, promé ku su kaida por a konservá su karakter hustu obedesiendo e lei di Dios. Pero el a falta ku n'e, i pa kousa di su kaida nos tin un naturalesa di piká, i nos no por hasi nos mes hustu. Komo nos ta pekador i impuru, nos no por obedesé un lei santu perfektamente. Nos no tin hustisia propio via kua nos por kumpli ku loke e lei di Dios ta eksihi. Pero Kristu a prepará pa nos un manera di salbashon. El a biba riba mundu den prueba i tentashonnan meskos ku esnan ku nos mester pasa aden. Sin embargo, Su bida no tabatin piká. El a muri pa nos, i awor E ta ofresé pa tuma nos pikánan i duna nos Su hustisia. Si nos entregá nos mes na dj'E i nos aseptá E komo nos Salbador, e ora ei, maske kuantu piká por tabatin den nos bida, pa konsiderashon na E, nos to ta kontá den e hustunan. E karakter di Kristu ta para na lugá di nos karakter, i nos lo ta aseptá pa Dios meskos ku si nos no a peka nunca.

Mas ainda, Kristu ta kambia e kurason. E ta biba den bo kurason pa medio di fe. Bo mester mantené e konekshon aki ku Kristu pa medio di fe i sigui entregá bo boluntat na dj'E konstantemente; tanten bo ta hasi esei, E ta obra den bo pa bo tin deseo di hasi conforme Su bon boluntat. Asina lo

KAMINDA NA KRISTU

bo por bisa: «E bida ku mi ta biba awor aki den karni, esei mi ta biba pa medio di fe den e Yu di Dios, ku a stima mi, i a entregá Su mes pa mi.» (Galationan 2:20).

Asina Hesus a bisa Su disipelnan: «Pasobra no ta boso ta papia, ma ta Spiritu di boso Tata ku ta papia den boso.» (Mateo 10:20). E ora ei ku Kristu trahando den boso, boso lo manifestá mes un spiritu i hasi mes un bon obranan — obranan di hustisia i obediensia.

Asina ta ku no tin nada den nos di gaba. Nos no tin motibu di halsa nos mes. Nos uniko fundamentu di speransa ta den hustisia di Kristu pone den nos, i esei ta obra di Su Spiritu obrando den nos i dor di nos.

Ora nos papia di fe nos mester kórda semper ku tin un distinsjon. Tin un klase di kreensia ku ta enteramente distinto di fe. E eksistensia i e poder di Dios, e bérdat di Su palabra, ta echonan ku ni Satanas mes i su siguidornan no por nenga di kurason. Beibel ta bisa ku «e diabelnan ta kere — i nan ta tembla!» (Santiago 2:19), pero esaki no ta fe. Kaminda tin, no solamente un kreensia den Palabra di Dios, sino ku ta entregá e boluntat na djE; unda ta dun'E e kurason, kaminda e afektonan ta fihá riba djE, einan tin fe, — fe ku ta obra pa amor i ta purifiká e alma. Pa medio di e fe aki, e kurason ta wórdu renobá den e imágen di Dios. I e kurason ku den su estado di karni no tabata suhetá su mes na e lei di Dios ni tampoko e no por a hasi esei, despues e ta gosa den su santu

E PRUEBA DI TA DISIPEL

mandamentunan, bisando manera e Salmista: «O, kuantu mi ta stima Bo lei! Hinter dia mi ta meditá riba dje.» (Salmo 119:97). I hustisia di lei ta kumpli den nos ku no ta kana «segun karni, ma segun e Spiritu.» (Romanonan 8:1).

Tin hopi hende ku a konosé e amor pordonadó di Kristu, i ku realmente ta deseá di ta yunan di Dios; sin embargo, nan ta rekonosé ku nan karakter no ta perfékto, nan bida ta defektuoso, i nan ta kla pa duda si nan kurason di bérdat a wórdu renobá pa e Spiritu Santu. Na e hendenan ei mi ke bisa ku nan no mester bira desesperá. Hopi biaha nos lo tin di baha abou i yora na pianan di Hesus pa kousa di nos faltanan; pero nos no mester pérdé nos ánimo. Asta si nos wórdu vensi mes pa e enemigu (diabel), nos no ta tirá afó, ni bandoná, ni rechasá pa Dios. Nó; Kristu ta na man drechi di Dios, i E ta intersedé pa nos. E disipel stimá Juan a bisa: «Mi ta skirbi boso e kosnan aki, pa boso no hasi piká, i si algun kometé piká, nos tin un Abogado serka e Tata, ku ta Hesu-Kristu, e hustu.» (1 Juan 2:1). I no lubidá e palabranan di Kristu: «Tata mes ta stima boso.» (Juan 16:27). E ke pa boso rekonsiliá ku n'E, pa mira Su puresa i Su santidat reflehá den boso. I na mes ora ku bo ke entregá bo na E, E ku a kuminsá e bon obra den boso, E ta hasi'é perfékto te e dia di Hesu-Kristu. Resa ku mas deboshon; kere mas kompletamente. Segun nos kuminsá deskonfiá nos mes forsa, laga nos konfia den e poder di nos Redentor, i nos lo alabá Esun ku ta salu di nos kara.

KAMINDA NA KRISTU

Mas serka nos ta di Hesus, mas imperfékto nos lo mira nos mes; pasobra nos ta mira mas klaramente nos defektonan na lus di e kontraste di Su naturalesa perfékto. Esei ta un señal sierto ku e engañonan di Satanas a pérde poder riba nos; i ku e Spiritu di Dios ta lantando nos.

No por eksisti berdadero amor profundo pa Kristu den e kurason ku no ta komprondé su mes maldat. E alma ku wordu transformá pa medio di gracia di Kristu ta admirá Su karakter divino; pero si nos no ta mira nos mes deformidat moral, esei ta un prueba inekibukabel ku nos no a alkansá na mira e bunitesa i ekselensia di Kristu.

Miéntras ménos kos di apresio nos mira den nos mes, mas nos ta bin admirá e pureza i bunitesa infinito di nos Salvador. Un bista di nos maldat ta impulsá nos bai serka Esun ku por pordoná nos; i ora ku nos komprondé ku nos no tin ningun poder pa yuda nos mes, i nos pidi Hesus yuda nos, E ta revelá Su mes na nos ku poder. Mas nos sinti ku nos tin mester di djE i mas nos studia e Palabra di Dios, mas vishon elevá nos lo tin di Su karakter, i mas plenamente nos lo reflehá Su imágen.

KRESIENDO DEN KRISTU

«Esun ku ta planta den bon tera,
esaki ta esun ku ta tende i komprondé e palabra i ku ta duna fruta.»
(Mateo 13:23).

Beibel ta yama e kambio di kurason, pa medio di kua nos ta bira yu di Dios, nasementu. Tambe e ta kompará esaki ku spreitmentu di e bon simia ku e plantadó a sembra. Di mes manera esnan ku ta resien kombérti na Kristu, ta manera «bébi resien nasi,» «kresiendo» na estatura di hende hómbèr i muhé den Kristu Hesus (i Pedro 2:2; Efesionan 4:15). Despues, manera e bon simia den kunuku, nan tin ku krese i duna fruta. Isaias a bisa ku nan lo ta «palu di bon kalidat, un hardin ku Señor a planta pa revelá su gloria.» (Isaias 61:3). Asina for di kosnan di naturalesa ta saka ilustrashonnan pa yuda nos komprondé mihó e bérdatnan misterioso di bida spiritual.

Sabiduria i inteligensia di tur hende huntu no por duna bida na un kos mas chikitu di naturalesa. Ta solamente dor di e bida ku Dios mes a duna, planchi i bestia por biba. Dje mes manera bida spiritual engrendrá den kurason di hende, ta bini solamente for di Dios. Si hende no «bolbe nase» (Juan 3:3) lo e no por tin parti den e bida ku Kristu a bin duna.

Manera ta sosodé ku bida, ta sosodé ku kresementu. Dios ta Esun ku ta hasi un kónópi habri bira flor i hasi flor bira fruta. Su poder ta hasi e simia duna

KAMINDA NA KRISTU

«promé yerba, despues tapushi i al fin trigo.» (Markos 4:28). E profeta Hosea ta bisa di Israel ku «e lo krese manera e leli.» «Nan lo bolbe biba manera trigo i floresé manera mata di wendruif.» (Hosea 14:5,7). I Hesus ta bisa nos: «Ripará e lelinan kon nan ta krese!» (Lukas 12:27). Planchinan i flornan ta krese, no pa nan mes kuido óf ansiedat óf esfuerso, sino resibiendo loke Dios a hasi pa duna nan bida. Un mucha no por hasi nada di dje mes pa e por bira mas grandi.

Ni boso no por hasi nada di boso mes, ni ku ansiedat ni ku esfuerso, pa boso por krese spiritualmente. Planchi i mucha ta krese resibiendo for di loke ta rónt di dje loke e tin mester pa bida, — aire, solo i kuminda. Loke e regalunan aki di naturalesa ta pa bestia i planchi, ta esei Kristu ta pa esnan ku ta konfia den djE. E ta nan «lus etérno» «un solo i eskudo.» (Isaias 60:19; Salmo 84:11). E lo ta manera «serena pa Israel.»

«Lo E baha manera áwaseru riba yerba kórtá.» (Hosea 14:5; Salmo 72:6). E ta e awa bibu, «e pan di Dios... ku ta baha di shelu, i duna bida na mundu.» (Juan 6:33).

Den e regalú inkomparabel di Su Yu, Dios a rondoná mundu hinter ku un atmósfera di grasía, mes real ku e aire ku ta sirkulá rónt di mundu. Tur esnan ku skohe pa respirá e aire aki ku ta duna bida, lo krese te na e altura di hómber i muhé den Kristu Hesus.

Manera un flor ta bira su kara den direkshon di solo pa e rayonan briante yuda perfekshoná su

KRESIENDO DEN KRISTU

bunitesa i simetria, asina nos mester bira nos kara pa e Solo di Hustisia, pa e lus selestial bria riba nos, pa nos karakter transformá den e imagen di Kristu. Hesus ta siña nos mes un kos ora ku E ta bisa: «Keda den Mi i Ami den boso. Meskos ku e rama no por karga fruta di dje mes, si e no keda pegá na e mata di wendruif, tampoko boso, si boso no keda den Mi... pasobra sin Mi nada boso por hasi!» (Juan 15: 4,5). Boso mester di e ouksilio di Kristu, pa biba un bida santu, meskos ku e rama ta dependé di e tronkon prinsipal pa su kresementu i parimentu. Sin dje boso no tin bida. No tin poder den boso pa boso resisti tentashon óf pa boso krese den gracia i santidat. Bibando den dje boso por floresé. Resibiendo boso bida for di djE, boso lo no marchitá ni laga di duna fruta. Boso lo ta manera mata plantá kant'ri di awa.

Hopi hende tin idea ku nan mester hasi algun parti di e trabou nan so. Ya nan a konfia den Kristu pa pordon di nan piká, pero awor nan ta buska pa biba rektamente pa medio di nan mes forsa. Pero kada esfuerso tal lo ta un frakaso. Hesus a bisa «Sin Mi nada boso por hasi.» Nos kresementu den gracia, nos goso, nos utilidat, tur ta dependé di nos union ku Kristu. Ta den komunion ku n'E, kada dia, kada ora, — bibando den djE, — nos mester krese den gracia. No solamente E ta e Outor di nos fe, sino E ta hasi'é tambe kompleto. Kristu ta tur kos, e prinsipio i e fin. E lo ta ku nos no solamente na prinsipio i na fin di nos kareda, sino na kada stap di kaminda. David a bisa: «Semper

KAMINDA NA KRISTU

mi a pone Señor mi dilanti; pasobra E ta na mi man drechi, lo mi no trompeká.» (Salmo 16:8).

Lo bo puntra: «Kon nos ta biba den Kristu?» - Di mes manera ku bo a risibi'É for di prinsipio. «Meskos anto ku boso a risibi Kristu Hesus, e Señor, kana tambe asina den djE.» «E hustu lo biba pa fe.» (Kolosensenan 2:6; Hebreonan 10:38). Boso a entregá boso mes na Dios, ku intenshon di ta kompletamente di djE, pa sirbi i obedesÉ, i boso a aseptá Kristu komo boso Salvador. Boso mes no por hasi rekonsiliashon di boso piká óf kambia boso kurason; pero entregando boso mes na Dios, boso ta kere ku pa kousa di Kristu El a hasi tur esaki pa boso. Pa medio di fe boso ta bira di Kristu, i pa medio di fe boso tin ku krese den dj'E — dunando i tumando n'e mes ora. Boso mester dun'E tur kos, — boso kurason, boso boluntad, boso sirbishi — duna boso mes na dj'E pa boso obedesé tur Su mandamentunan; i boso mester tuma tur — Kristu, e plenitud di tur bendishon, pa por biba den boso kurason, i pa ta boso forsa, boso hustisia, boso ayuda etérno — pa duna boso poder pa obedesé.

Konsagrá bo mes na Dios tur mainta; hasi esaki bo promé trabou. Laga bo orashon ta asina: «Tuma mi, O Señor, komo enteramente di Bo. Mi ta pone tur mi plannan na Bo pia. Usa mi awe den Bo sirbishi. Biba ku mi, i laga tur mi trabou wórdu hasi den bo.» Esaki ta un asunto di tur dia. Kada mainta konsagrá bo mes na Dios pa hinter e dia ei. Someté tur bo plannan na djE, pa hasi nan óf laga nan para un banda segun E indiká bo.

KRESIENDO DEN KRISTU

Asina bo por pone bo bida tur dia den man di Dios, i asina bo bida lo keda moldiá bes tras bes manera esun di Kristu.

Bida den Kristu ta un bida di deskanso. Kisas no tin ékstasis di sintimentu, pero mester tin un konfiansa kontinuo i na pas. Boso speransa no ta den boso mes; e ta den Kristu. Boso debilidad ta uni na Su forsa, boso ignoransia na Su sabiduria, boso debilidad na Su poder etérno. Asina ku boso no mester mira na boso mes, no laga e mente keda drei rónt di boso mes, pero wak na Kristu. Laga e mente pensa riba Su amor, riba e bunitesa i perfékshon di Su karakter. Kristu ku a nenga Su mes, Kristu den Su umiyashon, Kristu den Su pureza i santidat, Kristu den Su amor inkomparabel, esaki ta e tópiko pa e alma pensa riba. Ta dor di stim'É, imit'É, dependé totalmente riba dj'E, ta e manera ku boso por ta transformá na Su semehansa.

Hesus ta bisa: «Keda den mi.» E palabranan aki ta duna un idea di deskanso, stabilitat, konfiansa. Atrobe E ta invitá nos: «Bini serka Mi... lo Mi duna boso deskanso.» (San Mateo 11:28). E palabranan di e Salmista ta ekspresá mes un pensamentu: «Warda trankil loke Señor lo hasi, sigui sper'É: E ta yuda,» I Isaias ta duna e siguransa ku: «Boso uniko forsa ta sintá den keda kalmu i konfia den dj'E.» (Salmo 37:7; Isaias 30:15). E deskanso aki no ta wórdu hañá den inaktividat; pasobra den invitashon di e Salvador e promesa di deskanso ta uni ku yamamentu na

KAMINDA NA KRISTU

trabou: «Tuma mi yugo riba boso... i lo boso haña deskanso.» (San Mateo 11:29). E kurason ku ta deskansá mas plenamente den Kristu ta esun ku ta traha mas sinseramente p'É.

Ora ku hende dediká hopi pensamentu na su mes, e ta alehá for di Kristu, e fuente di forsa i bida. P'esei e esfuerso konstante di Satanas ta pa mantené e atenshon di hende leu for di e Salbador, i asina ei e ta stroba e union i komunion di e alma ku Kristu. Plasernan di mundu, ansiedatnan di bida, konfushon i tristesa, faltanan di otro, óf bo mes faltanan i imperfekshonnan — e ta usa kualkier un di e kosnan aki óf nan tur pa desviá e mente. No wórdu guiá pa su engañoan. Hopi hende ku realmente tin konsenshi i ku ta deseá di biba pa Dios, hopi bes satanas ta laga nan keda pensa riba nan mes faltanan i debilidatnan, i separando nan di e forma ei for di Kristu, e ta spera di tin viktoría. Nos no mester hasi nos mes e sénter di nos pensamentu, ni tin ansha i miedu tokante si nos lo ta salvá óf nó. Tur esaki ta desviá e alma for di e Fuente di nos fortaleza. Entregá e kuido di bo alma na Dios, i tene konfiansa den dj'E. Papia di Hesus i pensa riba dj'E. Laga bo persona pérdé den dj'E. Saka tur duda afó; laga tur miedu bai. Bisa manera apóstel Pablo: «Mi ta biba; ma no mi mes mas, ma Kristu ta esun ku ta biba den mi; i e bida ku mi ta biba den karni, mi ta biba pa medio di fe den e Yu di Dios, ku a stima mi, i a entregá Su mes pa mi.» (Galationan 2:20). Deskansá den Dios. E por warda loke bo a konfi'E. Si bo pone bo mes

KRESIENDO DEN KRISTU

den Su mannan, E ta hasi nos mas ku vensedor pa medio di Esun ku a stima nos.

Tempu ku Kristu a tuma naturalesa humano riba E mes, «El a uni Su mes ku humanidat pa medio di un laso di amor ku nunca por kibra pa ningun poder, sino pa e hende mes ku tabata ke. Tur ora Satanas ta gaña nos pa pone nos kibra e laso aki, — e ke hasi nos skohe pa separá nos mes for di Kristu. Ta akinan nos tin ku vigilá, lucha, resa, pa nada no sedusi nos pa bai skohe un otro maestro; pasobra semper nos ta liber pa hasi esei. Pero laga nos mantené nos bista fiho riba Kristu, i E lo preservá nos. Konfiando den Hesus nos ta sigur. Nada no por saka nos for di Su man. Mirando na E konstantemente, «Nos ta wórdu kambia den mes un imágen, di gloria na gloria, komo pa Spiritu di Señor.» (2 Korintionan 3:18).

Asina e promé disipelnan a bin parse manera nan amante Salvador. Ora e disipelnan aki a tende e palabranan di Hesus, nan a sinti nesetidat ku nan tabatin di E. Nan a busk'E, nan a kontr'E, i nan a sigui'E. Nan tabata kun'E den kas, na mesa, den lugarnan apartá, den kunuku. Nan tabata ku n'E manera muchanan di skol ku nan maestro, resibiendo tur dia di Su boka lésnan di bérdat santu. Nan tabata wak na E manera sirbidó ta mira su shon, pendiente pa siña nan debernan. E disipelnan aki tabata hende «ku mes un naturalesa ku nos.» (Santiago 5:17). Nan tabatin mes un lucha pa bringa kontra piká. Nan tabatin mester di mes un gracia, pa biba un bida santu.

KAMINDA NA KRISTU

Asta Juan, e disipel stimá, esun ku mas klaramente a yega di reflehá e imágen di e Salvador, no a nase ku e karakter bunita ei. No solamente e tabata sinti'é grandi i tabata ambishoná honor, sino e tabatin un karakter violento i e tabata keda resenti si hende ofende. Pero ora el a mira e karakter di Kristu, el a ripará su mes defektonan i komprondiendo esei, el a baha kabes. E fortaleza i pasenshi, e poder i ternura, e mahestat i mansedumbre, ku el a mira den bida diario di e Yu di Dios, a yena su alma di admirashon i amor. Dia pa dia su kurason tabata wórdu halá mas serka di Kristu, te ku el a bin pérde bista di su mes den su amor pa su Maestro. Su genio renkoroso i ambisioso a disparsé pa e poder transformadó di Kristu.

E influensia regenerá di e Spiritu Santu a renobá su kurason. E poder di e amor di Kristu a obra un transformashon di karakter. Esaki ta e resultado sigur di e union ku Hesus. Ora Kristu ta biba den e kurason hinter e naturalesa ta wórdu transformá. E Spiritu di Kristu i Su amor, ta suavisá e kurason, e ta someté e alma, i ta spiérta pensamentu i deseo pa Dios i pa shelu.

Ora Kristu a subi bai shelu, e sintimentu di Su presensia a keda ainda ku esnan ku tabata sigui'E. Tabata un presensia personal, yen di amor i lus. Hesus, e Salvador ku a kaná i kombersá i resa ku nan, ku a papia palabranan di speransa i konsuelo na nan kurason, ainda tabata komuniká ku nan un mensahe di pas miéntras E tabata wórdu hibá

KRESIENDO DEN KRISTU

shelu for di nan, i tono di Su bos a bin bék na nan, ora ku un nubia di angelnan a risibi'E: «Ata, ku bosu mi ta tur dia te na fin di mundu.» (San Mateo 28:20). El a subi na shelu den forma di hende. Nan tabata sabi ku E tabata dilanti di trono di Dios, ainda komo nan Amigu i Salbador; ku Su simpatianan no a kambia; ku E tabata ainda identifiká ku humanidat doliente. E tabata presentando dilanti Dios e méritonan di Su mes sanger presioso, E tabata mustrandu Su mannan i Su pianan traspasá komo un kórdamentu di e preis ku el a paga pa e hendenan ku El a redimi. Nan tabata sabi ku El a subi na shelu pa prepará lugá pa nan, i ku lo E bolbe atrobe pa hiba nan huntu ku n'E.

Despues di Su asenshon nan a kongregá, ansioso pa presentá nan petishonnan na Tata den nómbor di Hesus. Ku reverensia solém nan a baha kabes den orashon ripitiendo e promesa: «Tur loke bosu pidi e Tata den Mi nómbor, E lo duna bosu. Te ainda bosu no a pidi nada den Mi nómbor. Pidi i lo bosu haña pa bosu goso por ta kompleto.» (Juan 16:23, 24). Nan a hisa e man di fe haltu i mas haltu, ku e argumento poderoso, «ta Kristu ken a muri, i ademas tambe a resusitá, ku ta asta na man drechi di Dios, ken tambe ta hasi interseshon pa nos.» (Romanonan 8:34).

I Pentekostes a trese e presensia di e Konsolador pa nan, di Ken Kristu a bisa, E «lo ta den bosu.» I El a pone aserka, «Ta kumbini bosu pa Mi bai; pasobra si Mi no bai, e Ayudante lo no bini serka

KAMINDA NA KRISTU

boso; ma si Mi bai, lo Mi mand'E pa boso.» (Juan 14:17; 16:7). I for di e dia ei Kristu mester a biba kontinuamente den kurason di Su yunan dor di e Spiritu. Nan union ku n'E tabata mas será ku tempu ku E tabata personalmente ku nan. E lus, i amor, i poder di presensia di Kristu tabata mustrá dor di nan, di tal manera ku ora hende mira nan «nan tabata atmirá i realisá ku nan tabata ku Hesus.» (Echonon 4:13).

Tur loke Kristu tabata pa Su disipelnan, E ta anhelá pa ta pa Su yunan awe; pasobra den e Ultimo orashon ku El a hasi, ku e grupo chiki di disipelnan rönt di djE, El a bisa, «Mi no ta resa pa esakinan so, ma tambe pa esnan ku lo kere den Mi pa medio di nan palabra.» (Juan 17:20).

Hesus a hasi orashon pa nos, i El a pidi pa nos ta unu ku n'E, meskos ku E ta ún ku e Tata. Ki presioso union esaki ta! E Salvador a bisa di Su mes: «E Yu no por hasi nada di Su mes;» «e Tata ku ta semper den Mi, ta hasi Su trabou.» (Juan 5:19; 14:10). Di manera ku si Kristu ta biba den nos kurason, E ta traha den nos «tantu pa ke, komo pa hasi segun Su bon boluntat.» (Filipensenan 2:13). Nos lo traha manera El a traha; nos lo manifestá mes un spiritu. I asina stimando E i bibando den dj'E, nos lo krese den tur kos den djE ku ta e Kabes — Kristu.» (Efesionan 4:15).

TRABOU I BIDA

Nos por djóin e angelnan pa trese felisidat na otronan. Dios ta e fuente di bida i lus i alegría pa e universo. Manera rayo di lus di solo, manera koriente di awa ku ta basha for di un fuente bibu, bendishonnan ta baha for di E na tur Su kriaturanan. I tur kaminda ku bida di Dios ta den kurason di hende, lo mira su influensha den amor i bendishon na otronan.

E alegría di nos Salvador tabata pa hisa i salba hende ku a kai den piká. Pa e por a hasi esei E no a konsiderá su bida komo kos presioso, pero El a soportá e krus, menospresiendo infamia. Asina angelnan semper ta kla pa traha pa felisidat di otronan. Esaki ta nan alegría. Loke kurason di hende egoista ta konsiderá komo un servisio umiyante, pa sirbi esnan ku ta infelis, i bou di tur aspekto inferior den karakter i rango, ta e trabou di angelnan sin piká. E spiritu di amor i sakrifisio propio di Kristu ta e spiritu ku ta yena shelu, i ta e kos mas prinsipal di su gloria. Esaki ta e spiritu ku e siguidornan di Kristu lo tin, e trabou kua nan lo hasi.

Ora un kurason tin e amor di Kristu den dje, meskos ku fragansia dushi, e no por skonde esei. Su influensia santu ta laga tur hende ku e trata sinti su efekto. E Spiritu di Kristu den e kurason ta manera un fuente di awa den desierto ku ta basha refreská tur kos, i ta hasi esnan ku ya ta serka di muri, ansioso pa bebe di e awa di bida.

KAMINDA NA KRISTU

Amor pa Hesus lo wórdu manifestá den un deseo pa traha manera El a traha, pa bendishoná i elevá humanidat.

E lo hiba na amor, ternura i simpatia na tur e kriaturanan ku ta gosa dje kuido di nos Tata Selestial.

Bida di nos Salvador riba tera no tabata un bida di komodidat i dedikashon na E mes, sino ku El a traha ku un esfuerso persistente, sinsero, inkansabel pa salba humanidat perdi. For di pesebre te na Kalvario El a sigui e kaminda di apnegashon-propio i E no a hui for di trabou duru, biahenan doloroso, kuido konstante pa otronan. El a bisa: «E Yu di hende no a bin pa wórdu sirbi, ma pa sirbi, i pa duna Su bida pa liberashon di hopi hende.» (Mateo 20:28). Ta esei tabata e gran ophetivo di su bida. Tur otro kos tabata di ménos importansia. Su kuminda i Su bebida tabata pa hasi boluntat di Dios i kaba Su trabou. Interes propio i egoismo no tabatin parti den Su trabou.

Asina tambe esnan ku ta tuma parti den gracia di Kristu lo ta kla pa hasi kualke sakrifisio, pa otronan pa ken El a muri por tin parti tambe den e don selestial.

Nan lo hasi tur nan posibel pa hasi mundu mihó pa nan permanensia den dje. E spiritu aki ta e kresementu sigur di e alma ku berdaderamente a kombérti. Tan pronto un hende yega na Kristu, ta nase den su kurason un deseo bibu pa laga otronan sa ki amigu presioso el a haña den Hesus; e berdat ku ta salba i santifiká no por keda será

TRABOU I BIDA

den dje. Si nos ta bisti ku e hustisia di Kristu, i si nos ta yen ku e goso di presensia di Su Spiritu, nos no por keda ketu. Si nos a purba i mira ku Señor ta bon, nos lo tin algu di bisa otronan. Manera Felipe, ora el a haña e Salvador, nos lo invitá otronan pa nan bini den Su presensia. Nos lo buska manera pa presentá nan e atrakshonnan di Kristu i e realidatnan invisibel di e mundu ku lo bini. Lo tin un gran deseo pa sigui den mesun kaminda ku Hesus a kana. Lo tin un anhelo sinsero pa esnan ku ta rónt di nos por mira e «Lamchi di Dios ku ta kita piká di mundu!» (Juan 1:29).

Si nos perkurá hasi bon na otronan esaki lo resultá den bendishonnan ku lo kai riba nos mes. Esaki tabata e propósito di Dios, dunando nos un parti di hasi den e plan di redenshon. El a duna hende e privilegio di partisipá di e naturalesa divino i na nan turno drama bendishonnan riba nan próhimo. Esaki ta e honor mas haltu i e alegría di mas grandi ku Dios por a duna hende. Esnan ku di e forma aki partisipá den trabounan di amor ta wórdu halá mas serka di nan Kreador.

Dios por a duna e mensahe di e evangelio, i tur e trabou di ministerio di amor, na e angelnan di shelu. E por a usa otro medio pa realisá Su propósito. Pero den Su amor infinito, El a skohe pa hasi nos kolaborador ku n'E, ku Kristu i ku e angelnan, pa nos por tin parti den e bendishon, e alegría i elevashon spiritual ku ta resultado di e ministerio desinteresá aki.

Nos ta simpatisá ku Kristu, dor di komparti Su

KAMINDA NA KRISTU

sufrimentunan. Kada akto di sakrifisio personal pa bon di otronan lo oumentá e spiritu di bondat den kurason di esun ku ta duna, halando e persona aki mas serka di e Redentor di mundu, ku, «siendo riku, El a bira pober pa stimashon pa boso, ya boso por a bira riku pa medio di Su pobresa.» (2 Korintionan 8:9). I solamente ora ku nos kumpli asina ku e propósito ku Dios tabatin ora El a krea nos, bida por ta un bendishon pa nos.

Si bo bai traha manera Kristu tabata ke pa Su disipelnan hasi, i gana almanan p'E, lo bo sinti nesidad di un eksperensia mas profundo i di un konosimentu mas grandi den kosnan divino, i lo bo tin hamber i set di hustisia. Lo bo roga na Dios i bo fe lo krese; i bo alma lo bebe na abundansia for di e fuente di salu. Ora bo kontra ku difikultat lo bo akudi na Beibel i na orashon. Lo bo krese den grasia i den konosimentu di Kristu i lo bo desaroyá un eksperensia riku.

E spiritu di trabou desinteresá pa otronan lo duna profundidat, stabilidat, i amabilidat, manera esun di Kristu, na e karakter, i ta, trese pas i felisidat na esun ku tin e spiritu ei. E aspirashonnan ta elevá. No tin lugar pa flohera óf egoismo. Esnan ku dje manera aki ehersé e bon modalnan Kristian lo krese i bira fuerte pa traha pa Dios. Nan lo komprondé e kosnan spiritual kla, nan lo tin un fe firme ku ta bai kresiendo, i mas poder den orashon. E spiritu di Dios, moviendo riba nan spiritu ta spiérta e armonianan sagrado di e alma, na kontesta di e toke divino. Esnan ku konsagrá nan

TRABOU I BIDA

mes asina pa trabou desinteresá na fabor di otronan, ta obrando sigur sigur nan mes salbashon. E uniko manera pa krese den grasia ta pa hasi desinteresadamente mesun trabou ku Kristu a pone den nos man — pa komprometé nos mes, te kaminda nos abilitat yega, na yuda i hasi bon na esnan ku mester di e yudansa ku nos por duna nan. Forsa ta bini di ehérsisio; aktivitat ta e kondishon mes di bida. Esnan ku ta purba mantené un bida Kristian aseptando pasivamente e bendishonnan ku ta bin pa medio di grasia, sin hasi nada pa Kristu, ta simplemente tratando di biba komiendo sin traha. Pero tantu den mundu spiritual komo natural, esaki semper ta hiba e hende atras. E hende ku nenga di usa su man i pianan, pronto lo pérdé poder pa usa nan. Di mes un forma e Kristian ku no ta hasi uso di e komprondementu ku Dios a dun'é, no solamente lo stop di krese den Kristu, sino ku e lo pérdé e forsa ku e tabatin kaba.

E iglesia di Kristu ta e agensia ku Dios a skohe pa salbashon di hende. Su mishon ta pa hiba e evangelio na hinter mundu. E obligashon ta pa tur Kristian. Kada un di nos, te na unda su talento i oportunitat pérmitti, tin ku kumpli ku loke e Salvador a manda. E amor di Kristu, revelá na nos, ta hasi nos debedor di tur esnan ku no konos'É. Dios a duna nos lus, no solamente pa nos so, sino pa komparti'é ku tur hende.

Si e disipelnan di Kristu tabata lantá pa nan deber, lo tabatin mil hende kaminda tin un so awe proklamando e evangelio den teranan pagano. I

KAMINDA NA KRISTU

tur esnan ku no por a partisipá personalmente na e obra, lo por a sostené esaki ku nan rekurso, ku nan simpatia, i ku nan orashonnan. I sigur lo por tabatin mas trabou sinsero pa e almanan den paisnan Kristian.

Nos no tin nodi di bai na tera di paganonan, óf sikiera bandoná e sirkulo será di nos hogar, si ta einan nos deber di trabou ta yama nos pa nos por traha pa Kristu. Nos por hasi esaki den sirkulo di nos hogar, den iglesia, entre nos konosinan, i ku e hendenan ku nos ta hasi negoshi ku n'é.

Mayor parti di nos Salvador Su bida aki riba mundu a wórdu usá pa traha ku pasenshi den wenkel di karpinté na Nazaret. Angelnan ministradó tabata sirbi e Señor di bida miéntras ku E tabata kana banda banda ku e hendenan di kunuku i trahadónan, sin wórdu rekonosé ni honrá. E tabata kumpliendo mes fielmente Su mishon miéntras ku E tabata traha den Su fishi humilde manera ora E tabata kura esnan enférmo óf kana riba olanan brutu di tempestat di laman di Galilea. Asina, nos tambe por kana i traha ku Hesus den debernan mas humilde ku tin i den posishonnan mas abou den bida.

E apóstel a bisa: «Kada ken mester sigui biba den un forma responsabel den bista di Señor den e situashon ku e tabata ora Dios a yam' é.» (i Korintionan 7:24). Hende di negoshi por manehá su negoshi di un moda ku e ta glorifiká su Maestro pa motibu di su fidelidat. Si e ta un berdadero disipel di Kristu, e ta hiba su religion den tur loke e

TRABOU I BIDA

ta hasi, i revelá e Spiritu di Kristu na hende. E hómber mekániko por ta un fiel representante diligente di Esun ku a realisá trabounan humilde aya den e serunan di Galilea. Tur esnan ku tin e nómber di Kristu (Kristian), mester traha di tal forma ku otronan, mirando nan bon trabou, por wórdu guiá na glorifiká nan Kreador i Redentor.

Hopi hende ta laga di duna nan don na e servisio di Kristu pasobra segun nan, otronan tabatin mihó moda i bentaha. Nan tin un opinion ku ta solamente esnan ku tin talento speshal tin ku konsagrá nan habilitatnan na servisio di Dios.

Hopi di nan a yega na pensa ku talento a wórdu duná solamente na sierto klase di hende faboresé, lagando otronan afó, ken klaro, no ta yamá pa tuma parti den e trabounan ni di rekompensanan. Pero den e parábola no ta mustra esei. Ora ku e shon di kas a yama su sirbientenan, el a duna kada un su trabou.

Ku un spiritu di amor nos por hasi e debernan di mas humilde di bida «manera pa Señor» (Kolosenenan 3:23). Si nos tin amor di Dios den nos kurason, esei lo mustra den nos bida. E olor dushi di Kristu lo rondoná nos, i nos influensia lo elevá i bendishoná.

Bo no mester warda oportunitat mihó óf habilitatnan ekstraordinario promé ku bo kuminsá traha pa Dios. No ta bon pa nos pensa sikiera loke mundu lo bisa di nos. Si bo bida diario ta un testimonio di pureza i sinseridat di bo fe, i otronan ta konvensi di bo deseo pa benefisiá nan, bo

KAMINDA NA KRISTU

esfuersonan lo no ta pérdi totalmente.

E disipel di mas humilde i di mas pober di Hesus por ta un bendishon pa otronan. Por ta ku nan no por mira ku nan ta hasiendo algun bon speshal, pero dor di nan influensa inkonsiente nan por lanta olanan di bendishon ku lo oumentá i profundisá, i kisas kual resultado nan lo sabi nunca di dje te e dia di rekompensa final. Nan no ta sinti, ni nan no sabi ku nan ta hasiendo algun kos grandi. No ta pidi di nan pa kansa nan mes ku ansiedat si nan lo tin éksito óf no. Solamente nan tin di sigui padilanti ku trankilidat, hasiendo fielmente e trabou ku e providensia di Dios ta manda, i nan bida lo no ta pórnada.

Nan mes alma lo krese kada bes mas i mas den semehansa di Kristu; nan ta trahadó huntu ku Dios den e bida aki, i asina nan ta preparando pa e trabou di mas haltu i pa e goso sin sombra di e bida ku ta bini.

UN KONOSIMENTU DI DIOS

Hopi ta e maneranan kon Dios ta buskando pa laga nos siña konos'E i trese nos den komunion ku n'E. Naturalesa ta papia sin fin na nos sentidonan. E kurason habri ta keda impreshoná ku e amor i e gloria di Dios manera nan ta revelá den obranan di Su man. E orea ku ta tende por skucha i komprondé e komunikashonnan di Dios dor di e kosnan di naturalesa. Terenonan bérde, palunan haltu, e kónopinan i flornan, e nubia ku ta pasa bai, e áwaseru ku ta kai, riunan ku ta zona, e glorianan di e shelunan, tur ta papia na nos kurason i ta invitá nos pa sera konosi ku Esun ku a traha tur e kosnan aki.

Nos Salvador a uni Su lésnan presioso ku e kosnan di naturalesa. E palunan, paranan, flornan, serunan, lagonan i e shelu bunita, meskos tambe sirkunstansianan i insidentenan di bida diario, tur tabata uni ku e palabranan di bérdat, di manera ku Su lésnan por bini kada bes di nobo na e memoria, asta meimei di e hopi kosnan di hasi di hende su bida di trabou.

Dios ke pa su yunan apresiá loke El a traha, i gosa di e simpel hermosura trankil ku El a dórna nos kas terenal ku n'é. Dios ta gusta kosnan bunita, i mas ku tur kos ku ta atraktivo parti pafó, E ta stima bunitesa di karakter ku ta mas atraktivo ku tur kos ekstérno i E ke pa nos kultivá puresa i humildat, manera grasianan trankil di flornan.

KAMINDA NA KRISTU

Si solamente nos ke skucha, tur loke Dios a krea lo siña nos lésnan presioso di obediensia i konfiansa.

For di e streanan ku den nan kareda den espasio, ta sigui di edat pa edat kaminda nan mester bai, asta e atom di mas chikitu, e kosnan di naturalesa ta obedesé boluntat di e Kreador. I Dios ta perkurá pa tur kos i E ta sostené tur kos ku E la krea.

Esun ku ta sostené innumerabel mundunan plamá den inmensidat tambe ta kuida e para chikitu ku ta kanta su kanto humilde sin miedu. Ora ku hende sali bai nan trabou, óf nan ta resa, ora nan kai drumi anochi, i ora nan lanta bék mainta; ora e riku ta fiesta den su palasio, óf ora e pober ta reuni ku su yunan na mesa kaminda no tin hopi kuminda, nos Tata Selestial ta vigilá tur ku térnura. Ningun hende no ta drama lágrima sin ku E laga di ripará. No tin ningun sonrisa ku E no ta marka.

Si solamente nos kere esaki bon kla, tur nos ansiedat sin nodi lo disparsé. Nos bida lo no ta dje yen di desapunto manera awor; pasobra kada kos, sea grandi of chiki, lo wórdu lagá den man di Dios, ku no ta konfundi pa kantidat di solisitut ku tin ni E no ta aplastá pa nan peso. Anto nos lo disfrutá di sosiego di alma, kua hopi hende a deskonosé pa basta tempu.

Segun bo sentidonan ta deleitá den e beyesa di tera, pensa riba e mundu ku lo bini, ku nunca lo konosé mancha di piká i morto; kaminda kara di naturalesa lo no karga e sombra di maldishon mas.

UN KONOSIMENTU DI DIOS

Laga bo imaginashon kapta e hogar di esnan salvá, i rekordá ku e lo ta mas glorioso ku bo imaginashon mas briante por figurá. Den e vários regalunan di Dios den naturalesa nos ta mira solamente un brio chikitu di Su gloria. Ta pará skirbi: «Ni wowo a mira, ni orea a tende, ni a subi na kurason di hende, loke Dios a prepará pa esnan, ku ta stim'E!» (2 Korintionan 2:9).

E poeta i naturalista tin hopi kos di papia di naturalesa, pero ta e Kristian ta esun ku ta gosa di e bunitesa di mundu ku e apresio di mas grandi, pasobra e ta rekonosé e trabounan di man di su Tata i ta kapta Su amor den flornan, i matanan i palunan.

Ningun hende por apresιά plenamente e nifikashon di seru i vaye, riu i laman, ken no ta wak riba nan komo un ekspreshon di Dios Su amor pa hende.

Dios ta papia ku nos pa medio di Su obranan providenshal, i pa medio di influensia di Su Spiritu Santu riba e kurason. Den nos sirkunstansianan i dor di loke ta rönt di nos, den kambionan diario tumando lugar, nos por kontra ku lésnan presioso, basta nos kurason ta habri pa diserni nan. E Salmista, observando obra di Dios Su providensia a bisa: «Mundu ta yen di amor di Señor.» «Ken ta esun inteligente? Lagu'é tuma esaki na kuenta, bira konsiente di fabornan di Señor!» (Salmo 33:5; 107:43).

Dios ta papia ku nos den Su Palabra. Akinan nos tin den liña mas kla, e revelashon di Su

KAMINDA NA KRISTU

karakter, di Su trato ku hende, i di e gran obra di redenshon. Akinan tin habri nos dilanti e historia di patriarkanan i profetanan i otro hende santu di tempu pasá. Nan tabata hómbènan «ku mes un naturalesa manera nos» (Santiago 5:17).

Nos ta mira kon nan a lucha ku desánimo meskos ku nos, kon nan a kai bou di tentashon meskos ku nos a hasi, i sin embargo, nan a kohe ánimo di nobo i nan a konkistá pa medio di gracia di Dios; i opservando, nos ta wórdu enkurashá den nos bataya pa hustisia. Segun nos ta lesa di e presioso eksperensianan ku nan tabatin, di e lus, amor i bendishon ku a toka na nan pa disfrutá di dje, i di e trabou ku nan a hasi dor di e gracia duná na nan, e ora ei e spiritu ku a inspirá nan ta sende un kandela di zelo santu den nos kurason, i un deseo pa ta manera nan den karakter — di kana ku Dios meskos ku nan a kana.

Hesus a bisa referiendo na e Skrituranan di Testament Bieu — i kuantu mas berdat dje Nobo — «Ta esei nan ta duna testimonio di Mi,» e Redentor, Esun den ken nos speransa di bida eterno ta sentrá (Juan 5:39). Si, hinter Beibel ta papia di Kristu. For di promé palabranan di kreashon— «i sin djE nada di loke ta trahá ta trahá» — te na e ultimo promesa ku ta na final di e Beibel, «Y ata, Mi ta bini pronto!» nos ta lesando di Su obranan i skuchando Su bos. (Juan 1:3; Revelashon 22:12). Si bo ta deseá di konosé e Salvador, studia Beibel. Yena hinter bo kurason ku e palabranan di Dios. Nan ta awa bibu, ku ta paga bo set. Nan ta

UN KONOSIMENTU DI DIOS

e pan bibu ku a baha for di shelu. Hesus a deklará, «Si boso no kome karni di Yu di hende i bebe Su sanger, boso lo no tin bida den boso.» I Eta splika su mes bisando, «E palabranan ku Mi ta papia ku boso ta spiritu i bida.» (Juan 6:53, 63). Nos kurpa ta formá di loke nos kome i bebe; i loke ta sosodé den bida natural ta sosodé tambe den bida spiritual.

E tema di redenshon ta un tema ku angelnan ta deseá di komprondé; e lo ta e siensia i kanto di esnan redemi durante e siglonan sin fin di etérnidat. E no ta digno pa pensa i studi'é kuidadosamente awor? E misericórdia sin fin i e amor di Hesus, e sakrifisio hasi na nos fabor, ta eksihi di nos un reflekshon mas serio i solém. Nos mester pensa riba e karakter di nos kerido Redentor i Intersesor. Nos mester meditá riba e mishon di Esun ku a bini pa salba Su puebel for di nan pikánan. Ora nos kontemplá asin'aki e temanan selestial, nos fe i amor lo bira mas fuerte, i nos orashonnan lo ta mas aseptabel na Dios, pasobra nan lo ta mas mesklá ku fe i amor. Nan lo ta inteligente i ferviente. Lo tin mas konfiansa konstante den Hesus, i un eksperensha bibu i diario den Su poder pa salba kompletamente tur esnan ku ta bini serka Dios pa medio di djE.

Segun nos ta meditá riba e perfekshon di e Salvador, nos lo deseá di ta transformá kompletamente, i renobá den e imágen di Su puresa. Nos alma lo tin hamber i set pa bira manera Esun ken nos ta adorá. Miéntras ku mas nos ta pensa riba Kristu, mas nos lo bai papia di

KAMINDA NA KRISTU

dj'E na otronan, i represent'É na e mundu.

Beibel no ta skibi pa hende sabi so; al kontrario, e ta destiná pa hendenan komun. E berdatnan grandi ku ta nesario pa salbashon ta wórdu hasi mes kla ku lus di mérdia; i ningun hende lo ekiboká i pérdé nan kaminda sino solamente esnan ku ta sigui nan mes huisio na lugar di e boluntat divino ku ta asina kla mustrá.

Nos no mester tin konfiansa den testimonio di ningun hende riba loke Skrituranan ta siña, ma nos mester studia e Palabra di Dios pa nos mes. Si nos laga otro hende pensa pa nos, nos energia lo keda kórtá i nos aptitut lo ta poko. E podernan nobel di e mente por baha asina tantu dor di falta di ehérsisio riba temanan digno di nan konsentrashon te na punto ku nan no ta kapas di kapta e nifikashon profundo di e Palabra di Dios. E mente lo desaroyá si us'é pa investigá e relashon di e tópikonan di Beibel, komparando skritura ku skritura i loke ta spiritual ku kosnan spiritual.

No tin nada mas mihó kalkulá pa fortalésé e inteligensia ku e estudio di Santa Skritura. Ningun otro buki ta asina potente pa elevá e pensamentunan, pa duna vigor na e fakultatnan, manera e bérdatnan amplio i nobel di Beibel. Si nos studia e Palabra di Dios manera mester ta, nos lo haña un mente amplio, un karakter nobel, i un firmesa di propósito, ku poko bes por mira den nos tempu. Nos lo saka tiki benefisio si nos lesa e Skrituranan purá purá. Un hende por lesa hinter e Beibel, i sin embargo, keda sin mira su bunitesa

UN KONOSIMENTU DI DIOS

Of komprondé su nifikashon profundo i skondi. Studiando un pasashi te ora su nifikashon parse nos kla i nos kapta su relashon ku e plan di salbashon, tin muchu mas balor ku lesamentu di hopi kapitulo sin niun propósito defini na bista i sin gana ningun instrukshon positivo. Tene bo Beibel serka bo. Ora bo tin oportunitat, les'é; siña e tékstnan for di kabes. Asta ora bo ta kana riba kaya, bo por lesa un pasashi, i meditá riba dje te ora e keda den bo memoria.

Nos no por haña sabiduria sin pone atenshon sinsero i studia ku orashon. Algun parti di Beibel ta berdaderamente demasiado kla pa nos komprond'é malu; pero tin otro ku nan nifikashon no ta asina kla, ku nos por mir'e na promé bista. Nos mester kompará un pasashi di skritura ku otro. Mester listra ku kuidou i mester reflehá riba dje ku orashon. Un estudio asina lo wórdu rekompensá abundantemente. Manera e trahado den mina ta diskubri bena di metal di balor skondi bou di superfisie di tera, asina tambe esun ku listra e Palabra di Dios ku perseveransia manera buskando un tesoro skondi, lo haña bérdatnan di hopi gran balor, kuanan ta skondi for di bista di e buskadó deskuidá. E Palabranan di inspirashon, meditá den e alma, lo ta manera riu di awa ku ta sali for di un fuente di bida.

Nunka nos no mester studia Beibel sin, orashon. Promé ku nos habri su blachinan nos mester pidi iluminashon di Spiritu Santu, i lo E duna nos esei. Ora Nathanael a bini serka Hesus, e Salvador a

KAMINDA NA KRISTU

bis'é: «Mira di berdat esaki ta un hudiu den ken no tin mentira!» Nathanael a bisÉ, «Unda Bo a konosé mi?» Hesus a respondé i bisa: «Promé ku Felipe a yama bo, ora bo tabata bou di e palu di figo, Mi a mira bo.» (Juan 1:47, 48). Asina tambe Hesus lo mira nos den lugarnan sekretu di orashon, si nos ta busk'E pa E duna nos lus, pa nos sabi kiko ta bérdat. Angelnan di mundu di lus lo ta ku esnan ku, ku humildat di kurason ta buska direkshon divino.

E Spiritu Santu ta eksaltá i glorifiká e Salvador. Ta Su trabou pa presentá Kristu, e puresa di Su hustisia, i e gran salbashon ku nos tin dor di E. Hesus ta bisa: E «lo tuma for di loke ta di Mi i deklar'é na boso.» (Juan 16:14). E Spiritu di bérdat ta e uniko maestro efektivu di bérdat divino. Kuantu importansha Dios tin den rasa humano, ya ku El a duna Su Yu pa muri p'é, i ta manda Su Spiritu pa bira hende su Maestro i guia konstante

E PRIVILEGIO DI ORASHON

«Tin un forsa ku hende por haña ora tur otro avudo terenal faya.»

Dios ta papia ku nos dor di naturalesa i dor di revelashon, dor di Su providensia i dor di influensia di Su Spiritu. Pero esaki no ta basta; nos mester habri nos kurason n'E. Pa nos por tin bida i energia spiritual, nos mester tin un komunion berdadero ku nos Tata Selestial.

Nos mente por wórdu atraé na djE; nos por meditá riba Su obranan, Su miserikórdianan, Su bendishonnan; pero esei no ta, den e sentido mas kompleto di palabra, komunion ku n'E. Pa nos ta den komunion ku Dios, nos mester tin algu di bis'E tokante nos bida real.

Orashon ta habrimentu di nos kurason na Dios manera na un amigu. No ku e ta nesario pa hasi Dios sa kiko nos ta; sino ta pa prepará nos na moda pa risibi'É.

Orashon no ta baha Dios serka nos, pero ta elevá nos na E.

Tempu ku Hesus tabata riba mundu El a siña Su disipelnan kon nan mester resa. El a siña nan hiba nan nesidat di kada dia dilanti Dios, i pone tur nan karganan riba djE. I e seguridat ku El a duna nan, ku nan orashon lo wórdu tendé, ta siguransa pa nos tambe.

Hesus mes, tempu E tabata biba huntu ku hende, tabata resa ku frekuensia. Nos Salvador a identifiká Su mes ku nos nesidatnan i

KAMINDA NA KRISTU

debilitatnan, ora E tabata resa i pidi na su Tata forsa nobo, pa sigui padilanti enfrentando deber i prueba. E ta nos ehémpel den tur kos. E ta un ruman den nos debilitatnan, «tentá den tur kos meskos ku nos,» pero komo un ser sin piká, Su naturalesa a hui for di maldat; el a sufri lucha i amargura di alma den un mundu di piká. Komo hende, orashon tabata p' E un nesesidat i un privilegio. E tabata haña konsuelo i alegría den komunion ku Su Tata. I si e Salbador di hende, e Yu di Dios, a sinti e nesesidat di hasi orashon, kuantu mas mortalnan debil, manchá ku piká, mester sinti e nesesidat di orashon ferviente i konstante.

Nos Tata Selestial ta sperando pa drama Su bendishonnan riba nos. Ta nos privilegio bebe abundante na e fuente di amor infinito. Ta straño ku nos ta resa asina poko! Dios ta kla i dispuesto pa tende e orashon sinsero di Su yu di mas humilde, i sin embargo, di nos parti nos ta tarda muchu pa presentá nos nesesidatnan dilanti Dios. Kiko e angelnan di shelu lo pensa di algun ser humano pober i sin forsa, ku ta suhetá na tentashon, ora ku Dios Su kurason yen di amor infinito ta kompadesé di nan i ta asina dispuesto pa duna nan mas di loke nan por pidi óf pensa, i sin embargo, nan ta resa asina tiki, i tin asina poko fe? E angelnan ta gusta buig dilanti Dios: nan ta gusta pa ta serka djE. Ta nan mayor alegría pa ta den komunion ku Dios; i sin embargo e yunan di hende ku tin tantu nesesidat di e yudansa ku Dios

E PRIVILEGIO DI ORASHON

solamente por duna, ta parse satisfecho pa kana sin e lus di Su Spiritu, i sin e kompania di Su presensia.

Sombranan di e malbado ta kompañá esnan ku ta deskuidá di hasi orashon. Tentashonnan di fluister di e enemigu ta lók nan pa hasi piká; i tur esei ta pasobra nan no ta hasi uso di e privilegio ku Dios a duna nan di hasi orashon. Pakiko e yunan di Dios ta asina térko pa hasi orashon, ora ku orashon ta e yabi ku ta den man di fe pa habri e depósito di shelu, na unda tin wardá e rekursionan infinito di e Omnipotensia? Sin orashon konstante i sin vigilansia diligente, nos ta den peliger di bira deskuidá i desviá dje kaminda rekto. E atversario ta buska konstantemente pa blókia e kaminda ku ta hiba na e stul di misericórdia, pa nos no haña pa medio di orashon i fe, grasia i poder pa resisti tentashon.

Tin sierto kondishon riba kual nos por spera ku Dios ta tende i kontestá nos orashonnan. Un di e promé kondishonnan ta pa nos sinti nesesidat di Su yudansa. El a hasi nos e promesa aki: «Pasobra

ta bai basha áwaseru riba e tera, morto di set, Mi ta bai laga roinan kore riba suela seku» (Isaias 44:3). Esnan ku tin hamber i set di hustisia, esnan ku ta deseá pa tin Dios den nan bida, por ta sigur ku nan lo wórdi satisfasé. E kurason mester ta habri pa influensia di e Spiritu; di otro manera e no por risibi e bendishonnan di Dios.

Nos gran nesesidat riba su mes ta un motibu, i e ta papia semper bon na nos fabor. Pero nos

KAMINDA NA KRISTU

mester buska Señor pa hasi e kosnan aki pa nos. E ta bisa: «Pidi i lo bo haña,» i «E, ku no a spar ni su propio yu, ma a entregu'É pa nos tur, kon anto lo E no duna nos tur kos pórna da ku n'E» (Mateo 7:7; Romanonan 8:32).

Si nos tolerá piká den nos kurason, si nos ta pegá na algun piká konosi, Señor lo no tende nos; pero e orashon di e alma ku a repenti lo wórdu aseptá semper. Ora ku nos a konfesá tur nos pikánan konosi, i drecha loke por a wórdu drechá, nos por spera ku Dios lo kontestá loke nos ta pidi'E.

Pa nos mes méritonan nunca nos no por haña gracia di Dios. Ta e méritonan di Hesus ta salba nos i su sanger ta limpia nos di nos piká; sinembargo, nos tin un trabou di hasi pa kumpli ku e kondishonnan di aseptashon. Un otro elemento di orashon triunfante ta fe. «Pasobra ta nesario pa esun, ku yega serka Dios, kere ku E ta eksisti, i ta rekompensá esnan ku ta busk'É.» Hesus a bisa Su disipelnan: «Tur loke boso resa pidi p'e kere ku boso a hañ'é kaba i boso lo hañ'é tambe.» (Markos 11:24). Nos ta kere sigur sigur tur loke E ta bisa nos?

Seguridat ta hopi i ilimitá, i fiel ta Esun ku a priminti. Ora ku nos no haña e kosnan ku nos a pidi, na e tempu ku nos a pidi, nos mester kere ainda ku Señor ta tende, i ku E lo kontestá nos orashonnan. Nos ta asina kórtiku di bista, i inkliná na hasi fout, ku algun bes nos ta pidi kosnan ku lo no ta un bendishon pa nos, i nos Tata Selestial den Su amor ta kontestá nos orashonnan dunando nos

E PRIVILEGIO DI ORASHON

loke ta pa nos bon, loke nos mes lo a deseá si nos tabata divinamente iluminá i por a mira tur kos manera nan ta realmente. Ora parse nos ku nos orashonnan no ta wórdu kontestá, nos mester tene mas duru na e promesa; pasobra e tempu di risibi kontesta lo bini siguramente i nos lo haña e bendishonnan ku nos tin mas mester di dje. Pero, si nos kere ku nos orashonnan lo ta kontestá semper di e manera i pa e kos partikular ku nos ta pidi, esei ta presunshon. Dios ta demasiado sabi pa ekibuká su mes, i demasiado bon pa nenga kualkier kos bon na esnan ku ta kana den rektitut. Asina ku, no tene miedu di konfia den djE, maske ku bo no ta mira unbes e kontesta na bo orashonnan. Konfia riba Su promesa sigur, «Pidi, i lo bo haña.» (Mateo 7:7).

Si nos konsultá nos duda i miedu, óf si nos trata di resolvé kada kos ku nos no ta mira klaramente, promé ku nos tin fe, e dudanan solamente ta oumentá i nan ta bira mas profundo. Pero si nos aserká Dios, sintiendo desampará i dependiente, manera realmente nos ta, si nos bini ku humildat i berdadero seguridat di fe i presentá nos nesesidatnan na Esun ken Su konosementu ta infinito, ku ta mira tur kos den kreashon, i ku ta goberná tur kos pa medio di Su boluntat i palabra, E por i E ke atendé nos klamor i hasi lus resplandesé den nos kurason. Pa medio di orashon sinsero nos ta wórdu poné den komunikashon ku mente di e Infinito. Por ta ku na e momentu ei nos no tin ningun prueba notabel ku e kara di nos

KAMINDA NA KRISTU

Redentor ta birá den nos direkshon ku kompashon i amor; pero esaki semper ta asina. Por ta, nos no ta sinti Su toke visibel, pero Su man ta riba nos ku amor i ternura kompasivo.

Ora ku nos bin buska miserikórdia i bendishon serka Dios, nos mester tin un spiritu di amor i pordon den nos mes kurason. Ta kon nos por resa: «Pordoná nos nos debenan meskos ku nos tambe ta pordoná nos debedornan,» i kana rónt, sin embargo, ku un spiritu ku no ta pordoná? (Mateo 6:12) Si nos spera pa nos mes orashonnan wórdu skuchá, nos mester pordoná otronan di mes forma, i mes tantu ku nos ta spera di wórdu pordoná.

Perseveransia den orashon a bira un kondishon pa risibi. Nos mester hasi orashon semper si nos ke krese den fe i den eksperensia. Nos mester «sigui konstantemente den orashon;» «sigui sinseramente den orashon, i ser vigilante den dje ku gradisimentu.» (Romanonan 12:12; Kolosensenan 4:2). Apóstel Pedro ta manda kristiannan «pa ta prudente i alerta den boso orashonnan.» (1 Pedro 4:7).

San Pablo ta manda «Laga boso deseonan den tur kos sea konosi dilanti Dios pa medio di orashon i rogamentu i gradisimentu.» (Filipensenan 4:6). «Ma stima nan,» apóstel Hudas a bisa, «resa guiá pa Spiritu Santu. Keda den e amor ku Dios tin pa boso.» (Hudas 20,21). Resamentu sin fin ta e union insesante di e alma ku Dios, di manera ku bida di Dios ta kore den nos bida; i for di nos bida e puresa i santidat ta bai bék na Dios.

E PRIVILEGIO DI ORASHON

Ta nesarario pa nos ta diligente den orashon; no laga nada stroba nos di hasi esei. Hasi tur bo esfuerso pa bo mantené un komunión habri tur ora entre Hesus i bo mes alma. Probechá tur okashon pa bo bai na e lugá kaminda sa tin orashon. Esnan ku realmente ta buskando komunión ku Dios, nos ta mira nan den kultonan di orashon, fiel na kumpli ku nan deber, sinsero i ku gana di kosechá tur e benefisionan ku nan por alkansá. Nan ta probechá tur okashon pa ta kaminda nan por risibi rayonan di lus selestial.

Nos mester hasi orashon den kompania di nos famia; i riba tur kos nos no mester deskuidá e orashon den privá; pasobra esaki ta bida di e alma. Ta imposibel pa e alma floresé miéntras ta neglighá orashon. E orashon publiko i huntu ku famia so no ta basta. Miéntras bo ta bo so habri bo alma na e wowo penetrante di Dios. E orashon sekretu mester wórdu tendé solamente dor di e Dios ku ta skucha orashon. Ningun otro orea kurioso no mester risibi e peso di tal petishonnan. Na e momentu di orashon privá e alma ta liber di influensianan dj'afó, liber di eksitashon. Trankil pero fervientemente, e orashon ta yega na Dios. Dushi i permanente lo ta e influencia ku ta sali for di Esun ku ta mira den sekretu, ken Su oido ta habri pa skucha e orashon ku ta sali for di profundidat di e alma. Pa medio di un fe simpel i trankil e alma ta manten'é den komunión ku Dios, i ta reko'h'é pa e mes rayonan di lus divino pa fortalés'é i sosten'é den e konflikto ku Satanas. Dios ta e toren di nos

KAMINDA NA KRISTU

fortalesa.

Resa den bo kamber; i segun bo ta hasi bo trabounan di tur dia, halsa bo kurason ku frekuensia na Dios. Ta di e manera ei Enoc a kana ku Dios. E orashon silensioso aki ta subi manera sensia presioso dilanti e trono di grasia. Satanás no por gana esun ku su kurason ta uní den e forma aki ku Dios.

No tin ora óf lugá kaminda ta inapropiá pa hasi un petishon na Dios. No tin nada ku por stroba nos di halsa nos kurason den spiritu di orashon sinsero. Meimei di hopi hende riba kaya, meimei di un transakshon di negoshi, nos por hasi nos suplikanan na Dios, i pidi e direkshon divino, manera Nehemias a hasi ora el a presentá su petishon dilanti rei Artaxerxes. Unda parti ku nos ta, nos por haña un manera pa ta den komunion ku n'É. Nos mester tin tur ora e porta di nos kurason habrí, i nos invitashon subiendo pa Hesus bini i biba komo wéspet selestial den nos alma.

Maske nos por ta rondoná di un atmósfera korumpí i manchá, nos no tin nodi respirá su mal holó, pero nos por biba den e atmósfera limpi di shelu. Nos por sera tur porta pa imaginashon impuru i pa tur pensamentu malu, dor di elevá nos alma na Dios pa medio di orashon sinsero. Esnan ku tin nan kurason habrí pa risibí e yudansa i bendishon di Dios, lo kana den un atmósfera mas santu ku esun di mundu, i nan lo tin komunion konstantemente ku shelu.

Nos mester tin ideanan mas kla di Hesus, i un

E PRIVILEGIO DI ORASHON

kompreshon mas komplete di e balor di kosnan eterno. E bunitesa di santidat mester yena kurason di e yunan di Dios; i pa nos por logra esei, nos mester buska e revelashon di kosnan selestial.

Laga nos alma esforsá i alsa su mes pa Dios por laga nos respirá e atmósfera selestial. Nos por mantené nos mes asina serka di Dios ku den kualke prueba inesperá, nos pensamentu ta bira na djE den forma natural meskos ku un flor ta buska direkshon di solo.

Presentá bo nesesidatnan, bo alegria, bo trabou, i bo miedunan dilanti Dios. Nos no por kans'É óf pone karga di mas riba djE. Esun ku a konta e kabeyan riba bo kabes, no ta indiferente na e nesesidatnan di Su yunan. «Señor ta yen di misericórdia i kompashon.» (Santiago 5:11). Su kurason di amor ta sinti duele pa nos tristesanan, asta ora nos papia di nan. Hiba serka dje den orashon tur e kosnan ku ta trastorná nos pensamentu. Nada no ta asina grandi ku E no por wanta, E ta sostené mundunan, E ta goberná riba tur e kosnan di universo. Nada ku di algun manera ta stroba nos pas ta asina chikitu ku E no ta ripará. No tin den nos eksperensia ningun pasashi asina skur ku E no por les'é; no tin ningun konfushon asina grandi ku E no por klar'é. Ningun kalamidat por sosodé ku niun di e mas ménos di Su yunan, ningun ansiedat molestiá e alma, ningun goso alegrá, ningun orashon sinsero skapa di nos boka, sin ku e Tata Selestial sabi di dje, sin ku E ta tuma un interes inmediato den dje. «E ta kura esnan ku

KAMINDA NA KRISTU

kurason kibrá i ta mara tur nan heridanan.» (Salmo 147:3). E relashonnan entre Dios i kada alma ta asina kla i kompleto komo si fuera no tabatin otro alma pa kua El a duna Su Yu stimá.

Hesus a bisa: «Boso lo pidi den Mi nómbel, i mi no ta bisa boso ku lo Mi pidi e Tata pa boso, pasobra e Tata mes ta stima boso.» «Ami a skohe boso... pa tur loke boso pidi e Tata den mi nómbel, E duna boso.» (Juan 16:26, 27;15:16). Pero hasi orashon den nómbel di Hesus ta algu mas ku simpel menshoná e nómbel ei na kuminsamentu i na final di un orashon. Ta di resa ku e sintimentunan i spiritu di djE, kere den Su promesanan, konfiando den Su gracia i hasi Su trabou.

Dios no ta pidi pa niun di nos drenta un konbento, ni ku nos mester retirá di mundu pa nos konsagrá nos na aktonan di adorashon. Nos bida mester ta manera bida di Kristu — entre e seru i e multitud. Esun ku no ta hasi nada mas ku resa, pronto lo e stop di resa, óf su orashonnan lo bira un rutina formal. Ora hende separá su mes di bida soshal, for di e sirkulo di deber kristian i di e obligashon di karga su krus; ora nan nenga di traha duru pa e Maestro ku a traha duru pa nan, nan ta pérdé e parti mas importante di orashon, i ya nan no tin estimulo mas pa deboshon. Nan orashonnan ta bira personal i egoista. Nan no por resa pa e nesesidatnan di humanidat óf pa e kresementu di e reino di Kristu, ni roga pa forsa pa nan por traha.

E PRIVILEGIO DI ORASHON

Nos ta sufri pérdida ora nos deskuidá e privilegio di asosiá huntu pa nos kada un fortalés e otro den e servisio di Dios. E bérdatnan di Su Palabra ta pérdé nan intensidat i importansha den nos mente. Nos kurason lo stóp di wórdu iluminá i spiértá pa su influensia santifikadó, i nos ta baha den spiritualidat. Den nos asosiashon komo Kristian nos ta pérdé hopi pa falta di simpatia pa ku otro. Esun ku ta será kompletamente den su mes no ta kumpliendo ku e posishon ku Dios a duné pa e okupá. Kultivo korekto di e elementonan soshal den nos naturalesa ta hasi nos sinpatisá ku otronan, i ta pa nos un medio pa kual nos por desaroyá i haña forsa den servisio di Dios.

Si tur kristian por a asosiá huntu, papiando un ku otro dje amor di Dios i di e bérdatnan presioso di redenshon, nan kurason mes lo a wórdu refreská, i un lo a siña otro. Diariamente nos lo a siña mas di nos Tata Selestial, hañando un eksperensia nobo di Su gracia; i anto nos lo a deseá pa papia di Su amor; i ku esaki nos mes kurason lo a wórdu keintá i animá. Si nos a pensa i papia mas di Hesus i ménos di nos mes, nos lo tabatin hopi mas di Su presensia.

Si solamente nos pensa riba Dios dje tantu bes manera nos tin prueba di Su kuido pa nos, nos lo tabatin E semper presente den nos pensamentunan, i nos lo tabatin alegria papiando di djE i alaband'E. Nos ta papia di kosnan temporal pasobra nos tin interes den nan. Nos ta papia di nos amigunan pasobra nos ta stima nan; nos tristesanan, i nos

KAMINDA NA KRISTU

alegrianan ta ligá ku nan. Sin embargo, nos tin motibu muchu mas grandi pa stima Dios, ku pa stima nos amigunan di mundu, i lo mester tabata e kos mas natural di mundu, pa tin E komo e promé den tur nos pensamentunan, pa papia di Su bondat, i konta su poder. E donnan riku ku El a drama riba nos, no tabata ku intenshon di absorbé nos pensamentu i amor di tal manera ku nos no tabatin nada di duna na Dios; sino pa konstantemente nos kórda di djE, i pa uni nos pa medio di lasonan di amor i gratitut na nos Benefaktor Selestial. Nos ta biba muchu pegá ku kosnan di mundu. Laga nos lanta nos bista na e porta habri di e santuario selestial, unda e lus di gloria di Dios ta resplandesé den kara di Kristu kende «tambe por salba esnan kompletamente, ku ta bini serka Dios pa medio di djE.» (Hebreonan 7:25).

Nos mester alabá Dios mas «pa Su misericórdia i pa Su obranan maravioso na e yunan di hende!» (Salmo 107:8). Nos ehersisionan di deboshon no mester konsisti enteramente den pidi i risibi. Nos no mester pensa semper den nos nesidadnan so, i nunca den e bendishonnan ku nos ta risibi. Nunca nos ta resa di mas, ma nos ta duna gradisimentu masha poko. Nos ta risibi e misericórdianan di Dios diariamente, i sin embargo, ki poko gradisimentu nos ta duna, ki poko nos ta alabá Dios pa loke ku El a hasi pa nos!

Den tempu antiguo Señor a ordená Israel, ku ora nan kongregá pa Su servisio: « boso lo kome

E PRIVILEGIO DI ORASHON

aya dilanti di Señor boso Dios; gosa huntu ku boso famia plenamente di e bon resultado ku Señor, boso Dios, a bendishoná boso trabou kun' é.» (Deuteronomio 12:7). _ Loke nos hasi pa gloria di Dios nos mester hasi' é ku alegría, ku kantikanan di alabansa i ku gradisimentu, no ku tristesa i ku kara sera.

Nos Dios ta un Tata tierno i misericórdioso. Nos no mester mira Su servisio manera un kos ku ta hasi nos bira tristu, manera un ehérsisio ku no tin gustu den dje. Nos mester tin alegría ora nos ta adorá Señor i tuma parti den Su obra. Dios no ke pa Su yunan, na ken El a duna un salbashon asina grandi, traha di un manera komo si fuera E ta un supervisor duru i eksigente. E ta nan mihó amigu; i ora ku nan ta ador'E, E ta spera di ta huntu ku nan, pa bendishoná nan i konsolá nan, pa yena nan kurason ku alegría i amor. Señor ke pa su yunan haña konsuelo den sirbi'E, pa nan por haña mas alegría ku opreshon den Su trabou. E ke pa esnan ku bin ador'E bai ku pensamentunan presioso di Su kuido i amor, pa nan ta kontentu den tur e situashonnan di bida diario, pa nan por tin grasía pa nan komportá nan mes honesto i fielmente den tur kos.

Ta nesesario pa nos ta rónt di e krus. Kristu i E krusifiká mester ta e tema di kontemplashon, di kombersashon, i di nos emoshonnan di mas gososo. Nos mester konservá den nos pensamentu kada bendishon ku nos ta risibi di Dios, i ora nos komprondé Su gran amor, nos mester ta dispuesto

KAMINDA NA KRISTU

na konfia tur kos den e man ku tabata klabá na krus pa nos.

Nos alma por subi bai to na shelu den alanan di alabansa. Dios ta wórdu adorá ku kantikanan i ku musika den e manshonnian selestial, i ora nos ekspresá nos gratitut nos ta yega mas serka di adorashon di e habitantenan di shelu. «Ken ku ofresé alabansa ta honra Dios.» (Salmo 50:23).

Laga nos ban, anto, ku alegria reverente dilanti di nos Kreador «Kantikanan di gratitut lo zona.» (Isaias 51:3).

KIKO MESTER HASI KU DUDA?

Hopi hende,. Especialmente esnan ku ta hóben den bida kristian, tin bes Ta sinti nan trantorná pa insinuashon di inkredulidat. Tin hopi kos den Beibel ku nan no por splika ni sikiera komprondé i Satanas ta usa esakinan sakudí nan fe i hasi nan duda ku Sagrado Skrituranan ta un revelashon di Dios. Nan ta puntra << Kon mi por sabi ta kua ta bérdat? Si Beibel berdaderamente ta e palabra di Dios, kon mi por libra mi mes di e dudanan ei? »

Nunka Dios no ta eksiguí pa nos kere sin duna nos suficiente prueba riba kual nos por basa nos fe. Su eksistencia, Su karakter e siguridat di Su Palabra, tur e kosnan aki ta establese riba testimonionan ku ta apelá na nos rason; i e testimonio aki ta abundante. Sinembargo, nunka Dios no a kita e posibilidat di duda. Nos fe mester ta basa riba evidensia, no riba demostrashon.

Esnan ku ke duda lo tin okashon; miéntras ku esnan ku realmente ta deseá di konosé bérdat, ta kontra ku pruebanan abundante riba kual nan por basa nan fe.

Ta impusibel pa e mente finito di hende komprondé klaramente e karakter di e obranan di e Infinito. Na e inteligensia skérpi, na e mente di mas haltu eduká, e Ser santu ei mester keda semper tapá den misterio. «Bo ta kere ku bo por sondia Dios ku bo por deskubri limite di Dios Todopoderoso? Ki' bo ke men antó? Su grandesa

KAMINDA NA KRISTU

ta surpasá shelu haltu. Ki bo ta kere? Su poder ta yega te den reino di morto» (Job 11:7, 8).

Apóstel Pablo a bisa: «O profundidat di rikesanan di sabiduria i di siensia di Dios! Ki inkomprendibel Su huisionan ta, i impenetrabel Su kamindanan!» (Romanonan 11:33). Pero maske «nubia i skuridat ta rónt di djE; hustisia i huisio ta e fundeshi di Su trono» (Salmonan 97:2). Nos por komprondé sufisiente di Su trato ku nos i di e motibunan ku ta impulsá esakinan, pa kapta den nan Su amor i misericórdia sin fin uni na poder infinito. Nos por komprondé mes tantu di Su propósitonan si ta pa nos bon pa sabi esei; i mas leu di esei nos mester konfia ainda den e man ku ta omnipotente i den e kurason ku ta yen di amor.

E Palabra di Dios, manera e karakter di su divino Outor, ta presentá misterionan ku nunca no por wórdu komprondé klaramente pa sernan mortal. E entrada di piká den mundu, e enkarnashon di Kristu, e regenerashon, e resurekshon, i hopi otro asunto ku ta wórdu presentá den Beibel, ta misterionan muchu profundo pa mente humano splika, óf sikiera komprondé nan klaramente. Pero nos no tin rason pa duda den Palabra di Dios pasobra nos no por komprondé e misterionan di Su providensia. Den naturalesa di mundu nos ta semper rondoná ku misterionan ku nos no por komprondé. Hasta e forman mas humilde di bida ta presentá un problema ku e filósofo di mas sabi no ta kapas di splika. Tur kaminda por mira kosnan atmirabel ku

KIKO MESTER HASI KU DUDA?

ta superá nos konosementu. Nos mester ta sorprendé anto pa haña den mundu spiritual misterionan tambe ku nos no por komprondé? E difikultat ta solamente den e debilidad i limitashon di mente humano. Dios a duna nos den Santu Skrituranan prueba suficiente di nan karaktér divino, i nos no mester duda di Su Palabra solamente pasobra nos no por komprondé tur e misterionan di Su providensia.

Apóstel Pablo ta bisa ku den Skrituranan «tin algun kos difisil pa komprondé, kua, esnan ignorante i débil den fe ta trose e kosnan aki i ta duna un otro aplikashon di nan, meskos ku di otro partinan di Skritura i asina nan ta hinka nan mes den pérdishon.» (2 Pedro 3:16). Inkrédulonnan a presentá e difikultatnan di Sagrado Skritura komo un argumento kontra di Beibel; pero mas aleu di esei, nan ta forma un prueba fuerte di su inspirashon divino. Si e no tabata bisa nada otro di Dios sino solamente loke nos por komprondé fásilmente, si su grandesa i mahestat por a wórdu komprondé pa hendenan mortal, e ora ei Beibel lo no tabatin e kredenshalnan inekibukabel di outoridat divino. E grandesa i misterionan mes dje temanan presentá mester inspirá fe den dje komo Palabra di Dios.

Beibel ta presentá e bérdat masha simpel i di un manera perfekto pa adaptá na e nesidadnan i anhelonan di kurason humano, i el a yega di straña i enkantá e mentenan mas haltamente kultivá, i na mes tempu e ta posibilitá esnan humilde i esnan

KAMINDA NA KRISTU

ku no ta tantu sabi pa nan por haña e kaminda di salbashon. Sinembargo, e bérdatnan aki deklará den forma asina simpel ta trata di asuntunan asina haltu, di asina hopi alkanse, i asina infinitamente mas ayá di e poder di komprehenshon humano, ku nos por aseptá nan solamente pasobra Dios a deklará nan na nos.

Asina kla tambe e plan di redenshon ta wórdu habri dilanti di nos, di un manera ku kualke hende por mira e stapnan ku e mester tuma pa e por arepentí su mes dilanti Dios i pa tin fe den nos Señor Hesukristu, pa e por ta salvá di e manera ku Dios a mustra nos; sinembargo, bou di e bérdatnan aki asina fásil pa komprondé, ta eksisti misterionan ku ta e lugá skondi di Su gloria, — misterionan ku ta mas haltu ku hende su pensamentu ora e ta investigando, i ku sinembargo, ta inspirá e buskadó sinsero di e bérdat ku fe i reverensia. Mas tantu e persona buska i listra Beibel, mas profundo ta su konvikshon ku esaki ta e Palabra di e Dios bibu, i rasonamentu humano ta baha kabes dilanti di e mahestat di revelashon divino.

Pa rekonosé ku nos no por komprondé e gran bérdatnan di Beibel klaramente, ta nifiká ku nos ta atmiti ku nos pensamentu finito no ta sufisiente pa alkansá kapta loke ta infinito; ku hende, ku su konosementu i sabiduria humano limitá, no por komprondé e propósitonan di Omnisiensia.

Pa motibu ku nan no por komprondé tur su misterionan, hendenan inkrédulo ta rechasá e Palabra di Dios; i no ta tur esnan ku ta profesá di

KIKO MESTER HASI KU DUDA?

kere den Beibel ta liber di peliger riba e punto aki. E apóstel Pablo a bisa: «»Mi rumannan, paga tinu pa ningun di boso, pa medio di un aktitut robes, no bira infiel na Dios bibu i bira lomba p'E.» (Hebreonan 3:12). Ta bon pa nos studia ku atenshon e siñansanan di Beibel, i pa investigá' «e kosnan profundo di Dios» te unda Santa Skrituranan ta revelá nan (1 Korintionan 2:10). Pasobra, maske ku «e kosnan sekretu ta pertenesé na Senor nos Dios,» «esnan revelá ta pertenesé na nos» (Deuteronomio 29:29). Pero ta obra di Satanas pa stroba e mente su podernan di investigashon. Sierto orguyo ta meskla ku e konsiderashon di e berdat di Beibel, di manera ku ora hende no por splika kada un di su partinan na su satisfakshon, e ta pérdé pasenshi i ta sinti derotá. Pa nan ta muchu humiyante rekonosé ku nan no por komprondé e palabranan inspirá. Nan no ta dispuesto di spera ku pasenshi te ora ku Dios huzga ku ta ora di revelá nan e bérdat. Nan ta kere ku nan sabiduria humano sin ningun yudansa ta sufisiente pa hasi nan komprondé e Santu Skrituranan, i ora nan no por hasi esei, nan ta nenga su outoridat enteramente. Ta bérdat ku hopi teoria i dóktrina, ku popularmente ta suponé di ta bini for di Beibel, no tin fundeshi den su siñansa, i enbérdat nan ta kontrali di hinter e intento di inspirashon. E kosnan aki tabata motibu di duda i konfushon pa hopi mente. Nan no ta, sin embargo, falta di e Palabra di Dios, sino ku hende a dañ'ele.

KAMINDA NA KRISTU

Si tabata posibel pa sernan kreá alkansá un konosementu completo di Dios i Su obranan, anto, si nan alkansá e punto aki, lo no tabatin pa nan ningun deskubrimentu mas aleu di bérdatnan nobo, ningun kresementu den konosimentu, ningun desaroyo di mente óf kurason. Pa nan Dios ya no tabata supremo mas; i hende, ya ku el a alkansá e limite di konosementu i progreso, lo a stóp di avansá. Laga nos gradisi Dios ku esei no ta asina. Dios ta infinito; «Den Ken tur e tesoronan di sabiduria i di konosementu ta skondi.» (Kolosensenan 2:3). I pa hinter etérnidat hende por sigui buska, sigui siña, i tóg nunca kansa di e tesoronan di Su sabiduria, Su bondat, i Su poder.

Dios tin intenshon, ku hasta den e bida aki e bérdatnan di Su Palabra sigui wórdu revelá konstantemente na Su puebel. I tin solamente un manera pa haña e konosementu aki. Nos por alkansá komprondé e Palabra di Dios, solamente pa medio di iluminashon di e Spiritu dor di kua e Palabra a wórdu duná. «Ningun hende sa tur kos di Dios sino solamente Spiritu di Dios» «Spiritu Santu ta investigá tur kos, si, asta e pensamentunan di Dios ku ta profundamente skondi.» (1 Korintionan 2:11, 10). I e Salbador Su promesa na Su siguidónan tabata, «Ma ora e Spiritu di berdat bini, lo E guia boso na bérdat kompletu;... Loke E konta boso E ta haña sa di Mi» (Juan 16:13, 14).

Dios ke pa hende ehersé nan poder di rasoná; i e estudio di Beibel lo fortifiká i elevá e mente

KIKO MESTER HASI KU DUDA?

manera ningun otro estudio por. Nos mester tin masha kuidou di no imaginá ku nos pensamentu ta masha haltu, pasobra e ta suheto na debilidat i flakesanan humano. Si nos no ke pa e Sagrado Skrituranan ta nublá pa nos komprondementu, di manera ku nos no por komprondé ni e bérdatnán di mas simpel, nos mester tin anto mes simplesa i fe di un mucha chikitu, kla pa siña, i kla pa buska yudansa di Spiritu Santu. E konosementu di e poder i sabiduria di Dios, i di nos inkapasidat pa komprondé Su grandesa, mester inspirá nos ku humildat, i nos mester habri Su Palabra ku adorashon santu, segun nos drenta den Su presensia. Ora nos bini na e Beibel, rason mester rekonosé un outoridat mas grandi ku e mes, i kurason i inteligensia mester buig pa e gran AMI TA.

Tin hopi kos ku aparentemente ta parse difisil òf skur, ku Dios lo hasi kla i simpel na esnan ku ta buska un komprondementu di nan. Pero sin guiansa di e Spiritu Santu, nos lo ta kontinuamente den peliger di trose e nifikashon di Sagrado Skrituranan òf di interpretá nan malu. Tin hopi manera di lesa Beibel ku nos no tin probecho den dje, i den algun kaso por kousa un daño sigur. Ora nos habri e Beibel di Dios sin orashon i sin réspét; ora ku nos pensamentu i afektonan no ta fiha riba Dios, òf na armonia ku Su boluntat, e mente ta nublá ku duda; anto den mes un estudio di Beibel, nos duda lo fortalésé. E enemigu lo tuma kontról di e pensamentunan, i e ta sugeri

KAMINDA NA KRISTU

interpretashonnan ku no ta korekto. Ki ora ku hende no perkurá pa ta na armonia ku Dios den obra i palabra, e ora ei, no importá kon studíá nan por ta, nan ta kapas na hasi eror den nan komprondementu di e Skrituranan, i no ta sabi pa konfia den nan splikashonnan. Esnan ku ta listra Beibel ku idea di buska kontradikshon, no tin bista interno spiritual. Ku vishon bruhá nan lo mira hopi motibu pa nan duda, i nan no ta kere den e kosnan ku realmente ta kla i simpel.

Nan por bisa loke nan ke, e motibu real di duda, kasi semper ta amor pa piká. E siñansanan i restriksjonnan di Palabra di Dios no ta agradabel pa e kurason orguyoso, ku ta stima piká, i esnan ku no ke obedesé na su rekerimentunan ta kla pa duda den su outoridat. Pa nos por yega na e bérdat, nos mester tin un deseo sinsero pa konosé e bérdat, i bon boluntat den nos kurason pa obedesé. Tur esnan ku ta studia Beibel ku e spiritu aki, lo haña suficiente evidensia ku e ta e Palabra di Dios, i nan por haña komprondementu di su bérdatnan ku lo hasi nan sabi pa salbashon.

Kristu a bisa: «Si un hende tin deseo di kumpli ku boluntat di Dios, e ta haña sa» (Juan 7:17).

En bes di diskuti i kritiká tokante loke bo no ta komprondé, pone atenshon na e lus ku ya ta bria kaba riba bo i bo lo risibi mas lus. Pa medio di grasia di Kristu, kumpli ku kada deber ku a wórdu hasi kla na bo komprondementu, i lo bo ta kapasitá pa komprondé i hasi esnan ku awor bo ta duda.

Tin un prueba ku ta na alkanse di nos tur — di

KIKO MESTER HASI KU DUDA?

esnan di mas haltu eduká i di esnan mas analfabeta, — e prueba di eksperensia. Dios ta invitá nos pa proba pa nos mes e realidat di Su Palabra, e bérdat di Su promesanan. E ta manda nos: «Purba, i mira ki bon Señor ta» (Salmo 34:8). Na lugá di dependé riba palabra di un otro hende, nos mester hasi prueba di nos mes. Kristu ta bisa: «Pidi, i lo bo haña.» (Juan 16:24). Su promesanan lo kumpli. Nunka nan a faya; nan no por faya nunca. I segun nos hala serka di Hesus, i alegrá den e abundansha di Su amor, nos duda i skuridat lo disparsé den e lus di Su presensia.

Apóstel Pablo ta bisa, ku Dios «a libra nos for di poder di skuridat i a pasa nos pa e reino di Su Yu stimá.» (Kolosensenan 1:13). I tur esnan ku a pasa di morto pa bida «esei a konfirmá ku Dios ta berdadero.» (Juan 3:33). E por duna testimonio «Mi tabatin mester di yudansa, i mi a haña esaki den Hesus. Kada nesesidat a wórdu supli, El a satisfasé e hamber di mi alma; i awor, e Beibel ta pa mi e revelashon di Hesukristu. Bo ta puntra pakiko mi ta kere den Hesus? — Pasobra E ta pa mi un divino Salbador. Pakiko mi ta kere den Beibel? — Pasobra mi a haña ku e ta e stem di Dios ku ta papia ku mi alma.» Nos por tin sigur den nos mes e testimonio ku Beibel ta bérdat, i ku Kristu ta e Yu di Dios. Nos sabi ku nos no ta siguiendo fábulanan astutamente imaginá.

Pedro ta konsehá su rumannan pa nan «krese den gracia i konosementu di nos Señor i Salbadó Hesukristu.» (2 Pedro 3:18). Ora ku e puebel di

KAMINDA NA KRISTU

Dios ta kresiendo den grasia, nan lo ta hañando konstantemente un komprondementu mas kla di Su Palabra.

Nan lo diserni lus nobo i bunitesa den su berdatnan sagrado. Esaki ta loke a sosodé den historia di Iglesia den tur tempu, i asina lo sigui te na fin. «Pero bida di un hende hustu ta manera salida di solo: ora pa ora e ta bira mas kla te ora e yega su punto mas haltu.» (Proverbionan 4:18).

Pa medio di fe nos por mira loke ta bin sosodé, i gara e promesa di Dios pa desaroyo di nos inteligencia, uniendo nos abilitatnan humano ku esun divino, i kada poder di e alma lo wórdu pon'é den kontakto direkto ku e Fuente di lus. Nos por ta kontentu ku tur loke a konfundi nos den e providensianan di Dios lo wórdu akclará e ora ei; e kosnan ku tabata difisil pa komprondé lo haña un splikashon; i kaminda nos komprondementu finito tabata mira solamente konfushon i propósitonan kibra, nos lo bin mira e armonia di mas perfekto i bunita.

*«Awor aki nos ta mira via un spil, no direktamente,
pero e dia ei nos lo mira direktamente.
Awor aki mi konosamente ta limitá. Pero e dia ei lo mi tin
konosamente komplemento manera Dios konosé mi
kompletamente».*

(1. Korintionan 13:12)

MI TA GOSA DEN SEÑOR

Hesus, bibando den bo, ta anhelá pa papia na kurason di esnan ku no konos'É

Eyunan di Dios a wórdu yamá pa nan ta representante di Kristu, pa nan muestra semper e bondat i e misericórdia di Señor. Manera Hesus a revelá nos e berdadero karakter dje Tata, asina nos tambe mester revelá Kristu na un mundu ku no konosé Su amor tierno, yen di kompashon. «Meskos ku Bo a manda mi den mundu,» Hesus a bisa, asina Ami tambe a manda nan den mundu.» «Ami den nan i Abo den mi;... pa mundu por sa ku ta Abo a manda mi.» (Juan 17:18, 23). Apóstel Pablo ta bisa na e disipelnan di Hesus: «Ta bon kla tóg ku boso ta un karta di Kristu,» «ku tur hende por lesa i komprondé.» (2 Korintionan 3:3, 2). Den kada un di Su yunan, Hesus ta manda un karta na e mundu. Si bo ta un siguidó di Kristu, E ta manda den bo un karta na e famia, e bario, e kaya kaminda bo ta biba. Hesus, bibando den bo, ke papia na kurason di esnan ku no konos'E. Tal bes nan no ta lesa Beibel óf nan no ta tende e stem di Dios ku ta papia ku nan den su blachinan; nan no ta mira e amor di Dios dor di Su obranan. Pero si abo ta un berdadero representante di Hesus, por ta ku pa medio di bo, nan por wórdu guiá pa komprondé algu di Su bondat i wórdu ganá pa stima i sirbi'E. Kristiannan ta pon'é komo kargadónan di lus riba e kaminda pa shelu. Nan mester reflehá na e

KAMINDA NA KRISTU

mundu, e lus di Kristu ku ta bria riba nan. Nan bida i karakter mester ta di tal manera ku dor di nan, otronan por haña un konsepto korekto di Kristu i di Su sirbishi.

Si berdaderamente nos ta representá Kristu, nos ta hasi pa Su servisio parse atraktivo manera E ta en realidat. E kristiannan ku ta yena nan alma ku amargura i tristesa, i ku ta murmurá i keha, ta duna na otronan un representashon robes i falsu di Dios i e bida Kristian. Nan ta duna e impreshon ku Dios no ta kontentu ku su yunan ta felis; i hasiendo esei nan ta duna un testimonio falsu kontra nos Tata Selestial.

Satanas ta regosihá ora ku e por logra di hasi e yunan di Dios depremi i pérdé nan fe. E ta gosa ora ku e ta mira ku nos ta deskonfiá Dios, dudando den Su bon boluntat i di Su poder pa salba nos. E ta kontentu pa hasi nos sinti ku Señor lo hasi nos daño pa medio di Su providensia. Ta obra di Satanás pa representá Señor komo faltando kompashon i piedat. E ta trose e bérdat tokante di djE. E ta yena hende su imaginashon ku idea falsu tokante Dios; i na lugá di pensa riba e bérdat tokante nos Tata Selestial, demasiado biaha nos ta fiha nos pensamentu riba e representashonnan falsu di Satanás i nos ta deshonorá Dios dor di deskonfi'E i murmurá kontra di djE. Satanás semper lo laga nos keré ku bida religioso ta un bida den skuridat. E ta deseá pa laga pasa ku e ta un kansansio i difisil; i ora ku un Kristian, dor di su inkredulidat, presentá den su mes bida e aspekto

MI TA GOSA DEN SEÑOR

aki di religion, e ta imitando e falsedat'di Satanas.

Hopi hende, siguiendo e kurso di bida, ta blo keda pensa riba nan eroran, nan faltanan i desapuntamentunan, i nan kurason ta yena ku tristesa i desánimo. Tempu mi tabata na Oropa, un ruman muhé di iglesia ku tabata hasiendo esaki i ku tabata den un aflikshon grandi, a skirbi mi, pidiendo algun palabra di ánimo. E anochi siguiente despues ku mi a lesa su karta, mi a soña ku mi tabata den un hardin, i ku un hende, parse ta e doño di e hardin tabata pasa ku mi dor di e hardin. Mi tabata piki algun flor i gosando di nan fragansia, ora e ruman muhé aki, ku tabata kana banda di mi, a hala mi atenshon na algun sumpiña mahos ku tabata stroba den su kaminda. Einan e tabata lamentando i yen di tristesa. E no tabata kana den e kaminda, siguiendo tras di e doño di e hardin, pero e tabata kanando meimei di sumpiña i ramanan. «O,» e tabata keha, «no ta duele ku e hardin bunita aki ta wórdu dañá dor di e sumpiñanan?» Anto esun ku tabata guia nos a bisa: «No hasi kaso di e sumpiñanan, pasobra e sumpiñanan solamente ta molestiá bo i heridá bo. Kohe e rosanan, e lelinan, i e klavelnan.»

Bo no tabatin algun eksperensia felis den bo bida? Bo no tabatin algun temporada presioso ora ku bo kurason tabata bati di alegria respondiendo na e Spiritu di Dios?

Ora bo habri e buki di bo eksperensianan ku a pasa, bo no ta kontra ku algun blachi agradabel? Akaso e promesanan di Dios, no ta manera e

KAMINDA NA KRISTU

flornan fragante ku ta krese na kada banda di bo kaminda? Lo bo no p ermite pa nan bunitesa i nan dulsura yena bo kurason ku alegria?

E sumpi ananan i e ramanan solamente lo hinka bo i hasi bo dol ; i si bo skohe solamente e kosnan aki, i present  nan na otro hende, apart di menospresi  e bondat di Dios, lo bo no ta strobando otronan di kana den e kaminda di bida?

No ta bon pa nos pone tur e rekuerdonan desagradabel di bida ku a pasa huntu,— e maldatnan i nan desenga o,— papia di e rekuerdonan aki i lament  di nan te ora ku des nimo aplast  nos. Un hende desanim  ta un hende yen  di skuridat, serando paf  e lus di Dios for di su mes alma i tirando sombra riba e kaminda di otronan.

Gradisi Dios pa e kuadronan bunita ku El a present  nos. Laga nos reuni e bendita promesanan di Su amor, i laga nos tene nan kontinuamente nos dilanti. E yu di Dios, lagando e trono di Su Tata, tapando Su divinidat ku humanidat, pa E por a salba hende for di poder di Satanas; Su triunfo na nos fabor, ku ta habri shelu pa pekadornan, revelando na hende su vishon e kamber unda e Divinidat ta revel  Su gloria; e rasa kai his  for di   pos di ruina kaminda pik  a bah' , i tres'  atrobe den konekshon ku e Dios infinito, i despues di wanta e prueba divino dor di fe den nos Redentor, bisti den e hustisia di Kristu, i elev  te na su trono — esakinan ta e kosnan ku Dios ke pa nos tin semper den nos pensamentu.

MI TA GOSA DEN SENOR

Ora ta parse ku nos ta duda den amor di Dios, i ku nos ta deskonfiá Su promesanan, nos ta deshonorE i nos ta hasi su Spiritu Santu tristu. Kon un mama lo sinti si su yunan ta keha konstantemente di dje, komo si fuera ku e no tin bon intenshon ku nan, miéntras ku en realidat durante hinter su bida el a esforsá su mes pa nan interesnan i pa duna nan komodidat? Suponé ku nan ta duda den su amor; esaki lo kibra su kurason. Ta kon kualke mayor lo sinti si su yunan trat'é asina? Ta kon nos Tata Selestial lo konsiderá nos, ora nos deskonfiá Su amor, ku a hib'E na duna Su uniko Yu stima pa nos por tin bida? Apóstel Pablo ta skirbi, «E ku no a spar ni Su mes Yu, pero a entregu'É na morto pa nos tur, lo E no a duna nos tur otro kos tambe?» (Romanonan 8:32). I sinembargo, kuantu dor di nan akshonnan, si no ta den palabra, ta bisando, «Señor no a bisa esei pa mi. Tal bes E ta stima otro, pero ami E no ta stima.»

Tur esaki ta destruyendo bo mes alma; pasobra kada palabra di duda ku bo papia ta duna invitashon na e tentashonnan di Satanas; e ta fortalese den bo e tendensia di duda i e ta ofensa di boso parti na e angelnan ministradó. Ora Satanas tenta bo, no laga ningun palabra di duda òf di skuridat sali for di bo boka. Si bo skohe pa habri porta pa su insinuashonnan, bo mente lo wórdu yená ku deskonfiansa i pensamentunan rebelde. Si bo papia di bo sintimentunan, kada duda ku bo ekspresá, no solamente lo reakshoná riba bo mes,

KAMINDA NA KRISTU

sino e ta manera un simia ku lo spreit i duna fruta den bida di otro nan, i tal bes ta imposibel pa kita e influensha di bo palabranan. Kisas bo por logra rekuperá for di e temporada di tentashon i for di e trampa di Satanás; pero por ta ku otro nan ku a wórdu dominá pa medio di bo influensha, no por skapa di e inkredulidat ku bo a insinuá. Ki importante ta pa nos papia solamente di e kosnan ku ta duna forsa spiritual i bida!

Angelnan ministradó ta atento pa tende ki klase di informashon bo ta dunando na mundu di bo Maestro Selestial. Kómbersá semper di Esun ku ta biba pa interstedé pa nos dilanti di e Tata. Ora ku bo duna un amigu man, laga e alabansa di Dios ta na bo boka i den bo kurason. Esaki ta hala su pensamentu na Hesus.

Nos tur tin di wanta prueba i aflikshonnan duru, i di resisti tentashonnan grandi. Pero no ta bon pa semper nos konta esei nan na hende; ta mihó nos konta tur na Dios den nos orashon. Hasi'é un kustumber pa nunca papia un palabra di duda, óf palabra ku ta kita hende su animo. Nos por hasi hopi mas pa iluminá e kaminda di otro nan i fortalese nan esfuersonan, si nos papia palabranan di speransa i alegria santu.

Tin hopi alma balente, ku ta oprimi seriamente dor di tentashonnan, i kasi nan por yega na pérdé kabes den e lucha ku nan ta aden kontra nan mes i kontra e poder di maldat. No desanimá nan den nan lucha duru. Hasi nan kontentu ku palabranan balente, yen di speransa, ku lo yuda nan riba nan

MI TA GOSA DEN SEÑOR

kaminda. Di e forma aki bo por reflehá e lus di Kristu. «Ningun di nos ta biba pa su mes» (Romanonan 14:7). Dor di nos influensha inkonsiente otronan por wórdu kurashá i fortalesé òf nan por wórdu desanimá, i apartá for di Kristu i e bérdat.

Tin hopi hende ku tin un idea masha robes di e bida i karakter di Kristu. Nan ta kere ku E tabata falta kalor i alegria; ku Su kara tabata será, severo, i tristu. Den hopi kaso hinter e eksperensia religioso ta pintá ku e bista skur ei.

Diferente bes a wórdu bisá ku Hesus a yora, pero nunca tabata konosi si El a yega di smail. Nos Salvador di bérdat tabata un hómber di tristesa, i konosi ku dole) pasobra El a habri su kurason pa tur e miserianan di hende. Pero maske ku Su bida tabata apnegá i sombrá ku tristesa i prekupashon, Su Spiritu nunca tabata molestiá dor di nan. Den Su kara nunca tabatin un ekspreshon di tristesa i deskontentu, sino semper di pas i trankilidat. Su kurason tabata manera un fuente di bida, i unda parti ku E tabata bai E tabata hiba deskanso i pas, goso i alegria.

Nos Salvador tabata profundamente serio i intensamente sinsero, pero nunca rabiá òf di mal beis. Bida di esnan ku ta imit'E lo ta yen di propósito sinsero; nan lo tin un sentido profundo di nan responsabilidat personal. Banidat lo wórdu pon'é un banda, lo no tin alegria borotante, ni chiste grosero; ma e religion di Hesus ta duna pas manera un riu. E no ta paga e lus di goso; ni e no ta stroba

KAMINDA NA KRISTU

alegria, ni e no ta nubla e kara briante i kontentu Kristu no a bini pa wórdu sirbi, sino pa E sirbi; i ora ku Su amor ta reina den e kurason, nos mester sigui Su ehémpel.»

Si nos pensa semper den e akshonnán egoista i inhustu di otro nan, nos ta haña ku ta imposibel pa stima nan manera Kristu a stima nos; pero si tur ora nos pensa den e amor maravioso i kompashon ku Kristu tin pa nos, nos lo manifestá mésun spiritu na otronan. Nos kada un mester stima i respetá otro, apesar di e faltanan i imperfekshonnan ku nos no por yuda di ripara. Nos mester kultivá humildat i siña deskonfiá nos mes, nos mester tin pasenshi i ternura pa ku e faltanan ageno. Esaki lo mata tur klase di egoismo i ta hasi nos grandi di kurason i generoso.

E Salmista ta bisa: «Konfia den Señor, i hasi bon, habitá tera i keda fiel» (Salmonan 37:3). «Konfia den Señor.» Kada dia ta bini ku su aflikshon, su trabou i su inseguridat; i ora nos topa, ki lihé nos ta pa papia di nan! Asina tantu problemanan fiá ta bini den e kombersashon, asina tantu miedu kultivá, asina un peso di ansiedat ta wórdu ekspresá ku kualkier hende lo por pensa ku nos no tin un Salvador poderoso i misericórdioso, ku ta kla pa skucha tur nos petishonnan i pa ta pa nos un Protektor konstante den kada ora di nesidad.

Algun hende semper tin miedu i nan ta fia problema. Tur dia nan ta rondoná ku e señalnan di Dios Su amor; tur dia nan ta gosa di e

MI TA GOSA DEN SEÑOR

abundansha di Su providensia; pero nan no ta hasi kaso di e bendishonnan ei ku nan tin awor. Nan mente semper ta pensa den un óf otro kos desagradabel ku nan tin miedu ku lo bini; óf por ta ku realmente ta eksisti algun difikultat, ku, aunke chikitu, ta siega nan wowo pa e hopi bendishonnan ku nan mester duna danki p'é. E difikultatnan ku nan ta kontra, na lugá di manda nan pa Dios, e uniko Fuente di yudansa, ta separá nan for di djE, pasobra nan ta spierta fatiga i kehamentu.

Nos ta hasi bon pa ta asina inkredulo? Ta di kon nos ta mal agradecido i deskonfiá? Hesus ta nos amigu; hinter shelu ta interesá den nos bienestar. Nos no mester permiti inseguridatnan i prekupashonnan di bida diario afligi nos spiritu i sera nos frenta. Si nos hasi esei, anto semper lo tin algu ku ta fastidiá nos i kansa nos. Nos no mester entregá na un ansiedat ku solamente ta gasta nos i destrui nos, pero ku no ta yuda nos soportá e pruebanan. Kisas bo por tin duda den bo negoshinan; bo situashon por bira dia pa dia mas skur, i bo por ta wórdu menasá ku pérdida; pero no tene miedu, konfia Dios, bis'E loke ta molestiá bo, i keda trankil i di bon ánimo. Pidi Dios sabiduria pa bo por manehá bo negoshinan ku bon huisio, i asina lo bo por preveni pérdida i desaster. Hasi tur loke ta di bo parti pa bo haña resultado favorabel. Hesus a priminti nos Su yudansa, pero no sin nos esfuerso. Si konfiando den nos Ayudante, bo a hasi tur loke bo tabata por, aseptá ku bon ánimo e resultadonan.

KAMINDA NA KRISTU

No ta boluntat di Dios pa Su puebel ta oprimi pa e peso di trabounan. Pero na mes tempu E no ke pa nos gaña nos mes. E no ta bisa nos: «No tene miedu; no tin niun peliger den bo kaminda.»

E sabi ku tin prueba i peliger, i E ta mustra nos esei masha kla. E no ta proponé pa saka Su puebel for di e mundu aki di piká i di maldat, pero E ta apuntá nan na un refugio ku nunca ta faya. Su orashon pa Su disipelnan tabata: «Mi no ta pidi pa Bo saka nan for di mundu, ma pa Bo warda nan for di e malbado.» «Den mundu» E ta bisa, «boso lo pasa aflikshon; ma tene kurashi, Mi a vense mundu!» (Juan 17:15;16:33)

Den e sermon riba seru, Kristu a duna Su disipelnan lésnan presioso tokante e konfiansa ku nan mester tin den Dios. E lésnan aki tabata pa konsolá e yunan di Dios durante tur siglo, i nan a yega na nos époka yen di instrukshon i konsuelo.

E Salvador a yama atenshon di Su disipelnan riba e paranan di shelu, kon nan ta kanta nan dushi kanto di alabansa, sin fada di trabounan di bida, pasobra nan «no ta planta ni kosechá.» I sin - embargo, e gran Tata Selestial ta duna nan di kome.

E Salvador ta puntra: «Boso no ta bal muchu mas ku esakinan?» (Mateo 6:26). E gran Dios ku ta proveé pa tur hende i bestia, ta habri Su man pa alimentá tur Su kriaturanan. E paranan di shelu no ta dje insignifikante ku E no ta ripará nan. E no ta laga kuminda kai den nan boka, pero e ta hasi provishon pa nan nesesidatnan. Nan mes mester sali bai buska e grano ku El a stroi rönt pa

MI TA GOSA DEN SEÑOR

nan. Nan mester prepará e material pa nan néshinan chikitu. Nan mester duna nan yunan kuminda. Nan ta bai nan trabou ku kantamentu, pasobra «boso Tata Selestial ta perkurá pa nan.» I « boso no ta muchu mas ku esakinan?» Boso, ku ta adoradónan inteligente i spiritual, boso no tin muchu mas balor ku e paranan den laira? Akaso e Outor di nos ser, e Konservadó di nos eksistensia, Esun ku a forma nos na Su mes imágen divino, lo no duna nos loke nos mester, si solamente nos tin konfiansa den djE?

Kristu a mostra Su dispelman na e flornan di mondi ku tabata krese bunita na kantidat ku e beyesa simpel ku e Tata Selestial a duna nan, komo un ekspreshon di Su amor pa hende. El a bisa: «Siña di e lelinan di sabana, kon nan ta krese.» E bunitesa i e simplesa dje flornan natural aki, ta muchu mas bunita ku e gloria di Salomon. E bisti di mas bunita ku arte por a produci, no por kompará ku e grasia natural, i e bunitesa radiante di e flornan ku Dios a krea. Hesus a puntra: «I si yerba di sabana, ku awe t'ei i mañan ta tirá den fórnú, Dios ta bisti'é asina, Dios lo no hasi muchu mas pa boso, hende di poko fe?» (Mateo 6:28). Si Dios, e Artista divino ta duna e flornan simpel, ku ta muri den un dia, nan kolónan delikado i variá, kuantu mas kuido lo E tin pa esnan ku El a krea na Su mes imágen? E lés aki di Kristu ta un skual kontra ansiedat, pa e kurason sin fe, i yen di duda. Señor ke pa tur Su yunan ta felis, yen di pas, i obedesidu. Hesus a bisa: «Pas Mi ta laga pa boso,

KAMINDA NA KRISTU

Mi pas Mi ta duna boso: no manera e mundu ta dun'é, Mi ta duna na boso. Boso kurason no bira intrankil i no spanta.» «E kosnan aki Mi a papia ku boso pa Mi legria por ta den boso i boso alegria por ta kompleto.» (Juan 14:27; 15:11).

E felisidat ku hende ta buska na un manera egoista, pafó di e kaminda di deber, ta mal balansá, insigur, kos ku ta pasa i ku no ta dura, anto e ta laga e alma yen di soledat i tristu; pero den e servisio di Dios tin alegria i satisfakshon; Dios no ta bandoná un Kristian i lagu'é den kaminda di duda; ni E no ta bandon'é i lagu'é den remordimentu inutil i frustrashon. Si nos no tin e alegrianan di e bida aki, nos por tin alegria ainda mirando e bida ku lo bini.

Pero asta akinan ainda Kristiannan por tin e goso di komunion ku Kristu; nan por tin e lus di Su amor, e konsuelo konstante di Su presensia. Kada stap den bida por aserká nos mas na Hesus, por duna nos un eksperensha mas profundo di Su amor, i por hala nos un stap mas serka di e hogar bendishoná di pas. Asina no laga boso pérdé boso konfiansa, sino mas ainda, tene seguridat firme, mas firme ku nunca. «Te aki Señor a yuda nos!» Y lo E yuda nos te na fin. (1 Samuel 7:12). Laga nos mira na e monumentonan ku ta kórda nos di loke Dios a hasi pa salba nos di man di e destruktur. Laga nos tene fresku den nos memoria tur e miserikórdianan tierno ku Dios a mustra nos — e lágrimanan ku El a seka, e dolónan ku El a suavisá, e ansiedatnan i temornan ku El a kita, e

MI TA GOSA DEN SEÑOR

nesesidatnan ku El a supli, e bendishonnan ku El a drama, fortifikando nos mes pa tur loke ta dilanti di nos, den e restu di nos peregrinashon.

Nos no por sino wak padilanti na inseguridatnan nobo den e konflikto benidero, pero nos por mira tambe loke ku a pasa kaba meskos ku loke ku lo bini, i bisa: «Te aki Señor a yuda nos!» «Segun bo dianan asina bo forsa lo ta.» (Deuteronomio 33:25). E prueba lo no ta mas grandi ku e forsa ku Dios a duna nos pa nos por want' e. Asina laga nos tuma nos trabou djis karninda nos hañ'é, keriendo ku pa kualke kos ku por bini, E lo duna nos forsa ku nos por wanta e prueba.

I despues portanan di shelu lo habri pa risibi e yunan di Dios, i di boka di e Rei di Gloria lo zona e bendishon den nan oreá manera e muzik mas riku: «Bini, boso ku ta bendishoná di Mi Tata, eredá e reino, prepará pa boso for di fundeshi di mundu!» (Mateo 25:34). Anto esnan redemi lo ta bonbini na e hogar ku Hesus ta preparando pa nan. Ayanan nan kompañeronan lo no ta esnan malbado di e mundu, gañadó, adoradó di dios falsu, impuru, i inkredulo; ma nan lo asosia ku esnan ku a vense Satanas, i ku pa medio di gracia divino a forma karakternan perfekto. Kada tendensia pekaminoso, kada imperfekshon, ku ta aflagi nan akinan, a wórdu kitá for di nan pa via di e sanger di Kristu, i e ekselensia i brio di Su gloria, ku ta surpasá e brio di solo, lo ta duna na nan. I e bunitesa moral, e perfekshon di Su karakter, ta bria

KAMINDA NA KRISTU

dor di nan, den balor surpasando muchu mas e splendor eksterior aki. Nan ta sin mucha dilanti di e gran trono blanku, kompartiando e dignidat i e privilegionan di e angelnan.

En bista di e erensia glorioso aki ku por ta di dje, «kiko un hende lo por duna komo pago pa su alma? (Mateo 16:26). E por ta pober, sinembargo e tin den su mes un rikesa i dignidat ku mundu nunca por duna. E alma salvá, i limpi di piká, ku tur su forsanan nobel dediká na e servisio di Dios, ta di un balor ku no tin komparashon; i tin alegria den shelu den presensia di Dios i e angelnan santu pa kada alma ku salba, un goso ku ta wórdu ekspresá den kantikanan di triunfo santu.